

出版說明

本書作者余景和，字聽鴻，清末江蘇宜興人（一八四七——一九〇七）。少年時因家貧廢讀，在孟河藥店裏當學徒，得暇自習醫書，潛心探討，數年後，偶然給人治愈危症，更刻意奮勉。那時有當地名醫費蘭泉見之，欲收爲門弟子，便棄所業從之，學成返家，不即以醫爲業，後來有友招往常熟治愈了危症，醫名大噪，纔允許留居其地開業，這時已四十歲了。他的行醫，凡貧苦人求診，不但不受酬，而且賙濟藥資，遇危急病症，常忘却己事，整天的撫慰存問病者，而不厭倦。所著有傷寒論翼註、外證醫案彙編（我社已出版）及改用今名校印的原書診錄集。

作者是近代內外科名醫，此書所載，大部份屬於內科範圍，爲其手錄治愈的大症及疑難雜症，兼及平日得之師友間的治驗。其好學深思，專精業務的堅毅精神，在他樸素敘述的各案治療經過中，可以領會得到。他在處理各種病症時的就證候揣摩病理，而作出適應機轉的治療方法，很多足以啓發臨床上靈悟通變之處。又可從他的豐富經驗中，歸納出幾種難症、重症的治療規律，例如治痿症須掌握着屬乾屬濕兩個辨治綱要；治黃疸用發汗攻下法者，百不得一，應知所戒慎；治服病不得先用攻下破氣之類。至於他所揭示「治外科必須通內科」和「凡謂仲聖法能治傷寒不能治調理症者，門外漢也」的主張，正是從他生平所擅長治驗中得來的結晶語，而自有它的正確性，值得尋味。

本書原名診錄集，初印於公元一九一八年，後經重印，流傳不廣。茲據海虞寄舫初印本重加校勘排印，除極個別無必要保留的病案及可省去的序文外，不作較大改動。

序

予聞聽鴻先生名，自游學孟河時。厥後拜讀所註傷寒論翼及外科醫案兩書，始得窺先生所學。歲辛亥，繼鴻世兄又以其先人遺著診餘集相示。以余之陋，所見醫案亦數十家，類皆羅列羣方，而略藥物重量與其劑數，卒無如先生所爲書者。反復低徊，如獲鴻寶，遂徹夜竟讀之。先生爲費公蘭泉高弟，費通百氏，學有淵源。抑予所佩羨於先生者，不僅於所學，且於其所受學。集中所載王九峰、馬省三、費士源、賈某、沙某，皆前輩中最著者。清道咸間，孟河醫學最盛，諸前輩治醫，恆窮年兀兀，刻苦自勵，以故能卓然成家，舉世稱道之。後學矜式之。今亡是矣。古之聞人，嘗不憚間關跋涉，求勝己者而師事之。昔丹溪謁羅太無，太無倨甚，數謁不見，至冒風雨拱立於其門，卒至盡得所學以歸。是故醫學者，非可閉戶造車者也。吾儕苟不能自得師，徒勞皓首耳。後之讀是集者，苟得先生所得，斯先生爲不朽矣。甲寅秋，繼鴻世兄索序於余，因就所欲言者，書而歸之。武進後學逸山薛元超拜撰。

序

余外舅聽鴻先生爲醫數十年，有等身著作，本編獨未刊。中所有者，雖寥寥短章，殆集衆長，所謂取諸人以爲善者也。人言先生操業，不斷之於報酬，以爲藹然仁者。不知以術濟人，其範圍猶狹，著書立說，使後之學者，知所折衷，其爲仁乃大也。元彥丁年荒嬉，虛糜歲月，不獲負劍辟咡，親承教誨。今者謬膺診務，閱歷略廣，而所學乃益形不足，獨居深念，輒凜虎尾春冰之懼。而先生則已爲古人，僅得於遺編尋繹緒餘，不及親炙，是可憾也。家大人嘗詔元彥曰：汝曹不知爲學之甘苦，以有蔭庇也。吾與汝岳皆以亂離之餘，憂憂獨造，憂患人事，百端紛集，而卒底於成。然自古之有成者，罔不如此，不獨醫道爲然。而蒙蔭庇者，輒終身不聞道，可知蔭庇之不足恃也。退而自維，彌復自疚。而於外舅之爲人，乃低徊往復，不能去懷，不獨於其書珍惜有加也。內兄繼鴻將以付梓，余亟懇懇之，固欲以永吾外舅之手澤，而亦願使天下人共見之。書之傳否，所謂文章公器，非戚族阿好所能左右。惟讀是編者，知先生之用心，因知爲醫之當潛心研求，不因人事紛擾而中輟，不故步自封，而樂取於人以爲善，則先生爲不朽矣。醫仁術也。然非操此業者之爲仁，乃能孳孳爲學，自立立人之爲仁。孟子謂函人仁於矢人，其實今之爲醫者，不免以函人而爲矢人之事。因於此書之付梓，謹述庭訓所聞，及元彥對於是書之感想，以就

余聽鴻醫案序

正於世人之嗜此編者。戊午孟冬子壻丁元彥謹識

目錄

關格	一
關格兼痿	三
痿	四
虛脹	六
腫脹	九
濕溫	一一
呃逆	一二
暑風痙厥	一三
暑溫	一四
暑犯厥陰	一五
戰汗	一六
冬溫咳痰	一七
濕痹	一八
久痛入絡	一九
戴陽	二〇

脫症	二一
陰陽並脫	二二
上下並脫	二三
虛斑亡陽	二四
陰斑瀉血	二六
陰斑熱陷	三〇
腹痛肝厥	三一
症犯厥陰	三二
厥陰傷寒	三三
痙厥	三四
食厥	三五
氣厥	三五
肝陽吐血	三六
膽汁不清	三七
熱極似寒	三八

熱深厥深	三九
嘔瀉虛痞	四一
結胸	四二
黃疸	四三
脾泄	四四
濕聚便血	四四
便血傷脾	四五
不食不便	四六
大便秘結	四七
小便癰悶	四八
遺精	四九
男子陰吹	五〇
脫肛奇治	五〇
溫補成消	五一
食參目盲	五一
藥積	五二
陽虛目疾	五三

膈内生蟲	五三
桃葉吐痰附瘧案	五五
尸厥	五五
祟病	五六
遊魂	五六
子痢	五七
胞阻	五八
胞壓膀胱	五八
胎前吐瀉	五九
滑胎	六〇
產後咳痢	六一
產後中暑	六二
產後氣脫	六二
產後血脫	六三
產後血暈	六四
產後洩難	六四
血分	六五

黃帶	六六
陰癢	六六
小兒初生撮口	六七
骨槽風	六八
瘰癧	六九
時毒	七〇
齒衄	七二
舌瘍	七二
咽喉	七四
發背	七七
流痰	七八
脇癰	七九
肺痿	七九
肺癰	八〇
痞積	八三
胃癰	八四
肝癰	八五

腸癰	八六
腎俞發	八八
懸癰	八九
痔漏	九〇
前陰	九一
截臂	九一
額上生蟲	九二
菖蒲根洗痔	九三

余聽鴻醫案

清 荆溪 余景和 聽鴻 著

關 格

琴川趙姓女，年十九，面色如常，毫無病容，脈見左弦右弱。余曰：木強土弱，肝木犯胃尅脾。飲食作吐否。其父曰：然。即進疏肝扶土降逆之劑。明日又至。其父曰：昨日所服之藥，傾吐而盡。余即細問其病之始末。其父曰：此病有一年半矣。余曰：何不早治。其父曰：已服藥三百餘劑，刻下只能每日飲人乳一杯，已月餘未得更衣。余乃細詢其前服之方，皆進退黃連湯、資液救焚湯、旋覆代赭湯、四磨飲、五汁飲、韭汁牛乳飲，俱已服過。又云：不但服藥，而川鬱金磨服已有三斤，沉香磨服亦有四五兩。余曰：今之鬱金，實即莪蕐之子，大破氣血。伽南香雖云理氣，其質是木，有氣無味。二味多服，津液愈虧，胃汁愈枯，臟腑日見乾澀。此乃雜藥亂投，大傷津液而成關格也。余細細思之，取大半夏湯加淡苳蓉、懷牛膝、金匱腎氣丸絹包同煎，以取半夏之辛開滑降，甘草、人參生津養胃，生蜜甘潤，甘瀾水取其引藥下行，增肉苳蓉之滑潤腸腑滋膏，牛膝之降下而潛虛陽，再以金匱腎氣丸溫動真陽，雲蒸雨施，藉下焦之陽而布上

焦之陰。服後仍傾吐而盡，余頗焦灼，問曰：人乳何以飲。其父曰：一杯作四五次方能飲盡。惟金匱腎氣丸乾者三四粒亦能下咽。余曰：得之矣。將原方濃煎，或置鷄鳴壺內，終日燉溫，頻頻取服。令病人坐於門前，使其心曠神怡，忘却疾病之憂。將腎氣丸四錢乾者，每次三四粒，用藥汁少些送之。一日夜盡劑，就余復診。余曰：別無他治，仍將蜜作腎氣丸乾嚥，以原方藥汁送之。服三四劑，忽然神氣疲倦，面色轉黃，一月餘未得更衣，忽下燥糞兩尺，臥床不能起矣。舉家驚惶。余曰：下關雖通，上關仍閉，飲食仍不得下，幸而乾者能嚥，尙有一線生機。將腎氣丸四錢和入蒸飯四錢搗丸，將前方去菴蓉、牛膝，遵前法漸漸吞之。後仍前法再加蒸飯四錢，照法吞之。數日後，胃得穀氣，食管漸潤。腎氣丸每日加服一錢，漸加至飯三四兩，皆用大半夏湯吞之。後以飯作丸，用清米飲吞之。一日能進飯丸四兩，再食以乾飯。上格已開，腑氣亦潤，後用潤燥養陰之品，調理三月而愈。所以仲聖之法，用之得當，如鼓應桴。人云仲聖之法能治傷寒，不能治調理者，門外漢也。關格皆屬津枯，倘用香燥以取一時之快，此乃暗藏利刃，殺人於無形之地耳。余於此症，焦勞兩月，始能治痊，亦生平一快事也。

琴川東周墅顧姓，年三十餘，素性好飲縱慾，腎虛則龍火上燔，嘔血盈盈，津液大傷。他醫以涼藥遏之。後年餘，大便秘結，匝月不解，食入即嘔，或早食暮吐。又經他醫投以辛香溫燥，嘔吐更甚。就余寓診。余曰：大吐血後，津液已傷，又經辛香溫燥，更傷其液，肝少血養，木氣上犯則嘔，腸胃乾澀，津不能下降，則

肺道不通，故而便堅陰結也。卽進進退黃連湯，加茯苓、枸杞、歸身、白芍、沙苑、菟絲、柏子仁、麻仁、牛膝、肉桂、姜、棗等溫潤之品。服四五劑，卽能更衣，其嘔亦瘥。再加鹿角霜、龜版膠，又服二十餘劑，乃痊。至今已八年矣。或有發時，服甘溫滋潤藥數劑卽愈。此症如專以香燥辛溫耗燥津液，關格斷難復起。汪訥庵曰：關格之症，治以辛溫香燥，雖取快於一時，久之必至於死。爲醫者當如何慎之。

關格兼痿

庚午，余治琴川孝廉邵君蔓如，生平嗜飲過度，且有便血證，便血甚多，始則飲食漸少，繼則四肢痿軟，後卽飲食不得入，手不能舉，足不能行，邀余診之。詢其顛末，每日只能飲人乳一杯，米粉粥一鍾而已。看前醫之方，皆服芳香溫燥。診脈弦澀而空，舌津燥。余曰：此乃血不養肝，津液乾澀，食管不利。夫格症皆屬津枯，剛燥之劑，亦在所禁。痿屬血少，不能榮養筋絡。多服燥烈芳香，胃汁枯，津液傷，痿症已成，格亦難免。卽進以養血潤燥之品。服五六劑，格症漸開。余思草木柔潤之劑，難生氣血，亦不能入絡，因其好酒，便血太多，後起此症，卽進以血肉有情之品。虎骨、鹿骨、龜版等膠，牛筋、蹄筋、鹿筋、羊脛骨、鷄翅及茯苓、線魚膠、枸杞、歸身、巴戟、豬脊筋、大隊滋補重劑。服十餘劑，關格大開，漸能飲食，手足痛勢已舒，手略能舉，步稍能移。後卽將此方加羊腎、海參、淡菜共十七味，約四五斤，濃煎收膏，服四五料，步履如常。

飲食亦復，手亦能握管矣。古人云：精不足者，補之以味。其言洵不誣也。

痿

琴川小東門王姓，年約十七八，素有滑泄遺精，兩足痿軟，背駝腰屈，兩手扶杖而行，皮枯肉削。彼云：我有濕氣，已服三妙湯數十劑，罔效。余曰：瘦人以濕爲寶，有濕則肥，無濕則瘦。觀其兩腿大肉日削，診脈兩尺細軟。難經曰：下損於上，一損損於腎，骨痿不能起於床。精不足者，補之以味。損其腎者益其精。如再進苦燥利濕，陰分愈利愈虛，兩足不能起矣。進以六味地黃湯，加虎骨、龜版、鹿筋、菴蓉、大劑填下滋陰。服十餘劑，兩足稍健。再將前方加線魚膠、鹿角霜等，服十餘劑，另服虎潛丸，每日五錢，兩足肌肉漸充，步履安穩。

治痿諸法，證治準繩各書，言語甚爲紛繁。以余思之，用法當簡，惟乾濕二字足矣。如花卉菜蔬，過濕則痿，過燥則痿，人之痿而不振，亦惟乾燥二字盡矣。看痿之乾濕，在肉之削與不削，肌膚之枯潤，一目了然。如肉腫而潤，筋脈弛縱，痿而無力，其病在濕，當以利濕祛風燥濕。其肉削肌枯，筋脈拘縮，痿而無力，其病在乾，當養血潤燥舒筋。余治痿症甚多，今憶兩條，未嘗不可爲規則也。治翁府船夥錢姓，至上海驟然兩足痿軟無力，不能站立。就診於余。診其脈帶澀兼數，按之數更甚，口中臭氣不堪，小便短赤，莖

中澀痛。問其上海宿妓否。答曰：住宿兩宵。可曾受濕否。曰：因醉後在船篷上露臥半夜，即兩足痿軟，不能起立。余見其兩足微腫，捫之微熱。余曰：此乃酒濕之熱內蒸，露濕之寒外襲，化熱難出。又房事兩宵，氣脈皆虛，濕毒流注於經絡。即進以萆薢、猪苓、赤苓、澤瀉、薏仁、木通、黃柏、牛膝、土茯苓、丹皮、草梢、桑皮等，服三劑，兩足漸能起立。後以北沙參、麥冬、石斛、薏仁、甘草、茯苓、萆薢、牛膝、知母、黃柏、桑皮、桑枝等，再服四五劑，步履如常。此治濕熱流注之痿也。又治一乾痿，常熟小東門外東倉街程鶴章，自四月寒熱，經他醫治至九月，先以牛蒡、豆豉、枳殼、厚朴等，至夏以藿香正氣之類，至秋以厚朴、枳殼、赤苓、腹皮等，均係燥濕淡滲之品，服百餘劑，以致遍身肌肉削脫，筋脈拘攣，四肢拳縮不能伸，手不能舉，足不能立，十餘日未能飲食，月餘不能更衣。王姓醫仍進以香燥淡滲。後邀余診，見其口唇上吊，齒露舌乾，不能吸烟，烟膏從齒縫中吞之，飲以稀粥，噎而難入，匝月不更衣。衆皆謂不起之症。余笑曰：此症最易治，斷不死。衆問故。余曰：精不足者，補之以味；損者益之，燥者潤之。當先用老肥鴨一隻，水海參一斤，猪蹄一斤，三物用大沙罐煨之糜爛，以布濾去渣滓，吹去油質，將此汁加以葱薑汁少許，醬酒和好燉溫，隨其量飲之。使其食管腑道潤滑，再論服藥。依法製服，飲之數日，似乎喉間稍爽，能下稀粥。再以大劑虎潛法去鎖陽，服四劑，其熱已平。再立一方：熟地一兩，淡苳蓉五錢，牛膝三錢，龜版一兩，虎骨五錢，蹄筋五條，麥冬五錢，石斛五錢，陳酒二兩，芝麻五錢，煎濃汁飲之，以鴨肉、海參汁助之。服十餘日，大便更燥。

矢數尺，胃納漸醒。服至四十天，肌膚潤滑，兩足漸能起立行走。服至百餘劑，胃氣大甦，兩手漸能舉矣。後調理二百餘天，手指仍然無力，尙不能握管作小楷，肌肉雖充，肢尙少力，今已七年，尙未復元。如不以大劑滋潤，藉灌溉之功，此症不死何待。服燥藥百餘劑，滋膏竭盡，醫家病家，兩不醒悟，豈非奇聞。余將痿症之乾濕兩條，錄之以質高明，未識然否。

虛 脹

朱雲卿，洞庭山人，年三十六七，在琴川老吳市典爲業，有氣從少腹直衝胸膈，腹脹如鼓，堅硬臍突，屢服檳榔、枳殼、五皮等消導剋伐之品，愈服愈脹，匝月未得更衣，兩足漸腫，小便不爽，面上色澤漸枯，胃氣日憊，欲回籍袖手待斃矣。吾友松筠張君，偕至余寓就診。余曰：脈遲澀而肌膚枯黯，腹硬而堅，不得更衣，此乃衝任足三陰肝脾腎陽虛，陰氣之所結也。衝脈起於氣街，挾臍而上。任脈起於中極之下，循腹裏，上關元。足三陰之脈，從足走腹。衝脈爲病，氣逆裏急。任脈爲病，男子內結七疝。肝脈爲病，有少腹腫滿。少腹氣衝於上，此乃衝疝之類也。陽氣虛不能運行，陰寒之氣，蟠結於中，結聚不消。況下焦陰氣上升，非溫不納。中宮虛餒，非補不行。投以東洋參、白朮、鹿膠、附、桂、茴香、巴戟、茯苓、枸杞、菟絲、薑、棗等溫補滑潤之品。服一劑，脹更甚。余曰：此氣虛不能運藥也。若更他法，則非其治。強其再服一劑，脹益甚，且

氣阻不爽。余再強其服一劑，忽然氣從下降，大解堅糞甚多，其腹已鬆，氣歸於少腹角，一塊如杯。余曰：當將此方購二十劑，煎膏緩緩服之。服盡而愈。所以治脹病當分虛實臟腑爲最要。此症若疑實脹，投以破氣攻伐，斷無生理矣。然不能辨之確，斷之的，見投劑不效，卽改弦易轍，有不致債事者乎。故治病以識症爲第一。按此脹屬肝脾腎。

常熟西門俞義莊俞濂洲先生之少君瑞舒世兄，年二十三。四時正酷暑，邀余診之。腹脹如鼓，足腫臥床。余問其病因，素有便血症。按脈極細，小便短赤。余曰：此乃久痢便血，脾腎兩虛，土敗之症也。觀前醫之方，大約檳榔、枳、朴、五皮、香砂、苓、瀉之類。余曰：此症非大用溫補助火生土，斷難有效。使其向虞山言子坎上取黃色泥土百斤，將河水攪渾澄清，煎藥炊茶煮粥，均用此水。若水盡再換泥一石，攪水兩石，用盡再換，取土可補土之義。進參、朮、附、桂、補骨脂、益智、黃芪、枸杞、巴戟、杜仲、熟地等大劑。腹上繫繩緊束。服大補藥三劑，以繩驗之，約鬆三指許。後余恐其太補，方中稍加枳殼，所繫之繩仍緊如故。以此驗之，破氣之藥一毫不能用也。專以溫補大劑，服百餘劑，其脹已消，約用去熟地四五斤，參、芪各四五斤，杞、朮等稱是。起床後服金匱腎氣丸並補劑而痊。至今六年，惟行路常有氣喘耳。下焦之虛，不易填也。按此脹屬脾腎。

常熟青果巷吳鑄菴先生，年五十餘，平素有便溏，清晨泄瀉，後腹脹臍突，腰平背滿，囊莖腿足皆腫，兩

臂脇肉漸削。余曰：便瀉傷及脾腎，非溫補不可。後進參朮等補劑，服三劑，腹脹仍然。二次邀余診，見其案頭有臨證指南、醫方集解等書。余曰：閣下知醫，莫非更吾方乎？彼曰：實不相瞞，將方中略加枳、朴、香砂等味耳。余曰：既然同道，若不依余，斷難取效。余存之方，切不可更動，約服四五十劑，即可痊愈。仍進參、朮、芪、草、益智、巴戟、仙靈脾、補骨脂、蕤朮、桂、附等。服四五十劑，便瀉已止，脹勢全消。至今四年，強健如昔。所以辨虛脹實脹，大約在便瀉便堅之間，亦可稍有把握，庶不致見脹即攻伐，尅消亂投也。按此脹屬脾腎。

常熟西弄少府魏葆欽先生之媳，因喪夫悵鬱，腹大如鼓，腰平背滿，臍突，四肢瘦削，臥則不易轉側。余於壬午秋抵琴川，季君梅太史介紹余至魏府診之。面色青而脈弦澀。余曰：弦屬木強，澀爲氣滯，面色青黯，肢瘦腹大，此乃木乘土位，中陽不運，故腹脹硬而肢不脹也。中虛單腹脹症。雖諸醫束手，症尙可挽。以枳、朴、檳榔等味，治木強脾弱中虛之症，如誅罰無罪，豈不僨事。恐正氣難支，急宜理氣疏肝，溫中扶土抑木，進以香砂六君湯，加乾薑、附子、刺蒺藜、桂枝、白芍、紅棗、檀香等。服五六劑，仍然。然終以此方爲主，加減出入，加杜仲、益智、陳皮等。服四五十劑，腹脹漸鬆，肢肉漸復，服藥百餘劑而愈。再服禹餘糧丸十餘兩，金匱腎氣丸三四十兩，腹中堅硬俱消，其病乃痊。今已十五年，其健如昔。吾師曰：脹病當先分臟脹腑脹、虛脹實脹，有水無水等因，寒涼溫熱、攻補消利，方有把握。若一見脹症，專用枳、朴、查、麴、五

皮等味，無故攻伐，反傷正氣，每致誤事耳。按此脹屬肝脾。常熟東門外顏港橋老虎灶內小童，年十歲，先因腎囊作脹，常熟俗名鷄肫臑，覓單方服之。延四十日後，肢瘦腹脹，臍突而高，作喘，腎囊脹亮，莖腫轉纍，如螺如索，小便六七日未通，奄奄一息。余診之，思如此危症，難於下手，急進濟生腎氣湯大劑，附、桂各一錢，倍車前、苓、瀉。服兩劑，小便漸通，一日數滴而已。後服之五六劑，小便漸暢，莖亦直而不轉矣。再以原方減輕，服二十劑，腹脹亦消，惟形瘦不堪，後以參苓白朮散調理而痊。將近十齡之童，前後服桂、附各兩餘，所謂小兒純陽一語，亦不可拘執也。按此脹屬腎。

腫脹

常熟縣南街麵店內某童，年十六七，冬日墜入河中，貧無衣換，着濕衣在灶前烘之，濕熱之氣侵入肌肉，而浮足腫，腹脹色黃，已有三年。友憐其苦，領向余診。余以濟生腎氣湯法，熟地一兩，萸肉二錢，丹皮二錢，淮藥三錢，澤瀉二錢，茯苓三錢，牛膝錢半，車前二錢，附子一錢，肉桂一錢。余給以肉桂一支，重五錢。時正酷暑，人言附、桂恐不相宜。又云：脹病忌補，熟地當去。余曰：此方斷不可改。服六劑，小便甚多，猝然神昏疲倦。人恐其虛脫。余曰：不妨。服六劑，有熟地六兩，一時小便太多，正氣下陷，未必即脫。待其安

寐，至明午始甦，而腫脹全消。後服參苓白朮散十餘劑而愈。

治病之方法，先要立定主見，不可眩惑，自然藥必中病，有一方服數十劑，一味不更而病痊者，非老於醫者不能也。余在師處見一童年二十，尙未通精，身長僅三尺餘，面黃色萎，腹脹臍平足腫。有戴姓偕來。吾師診之，問曰：此是何人？戴姓曰：是寒舍之牧牛傭也。問曰：工錢一月若干？戴姓曰：三百文。吾師曰：不必開方，回去待斃可也。戴姓曰：此豈絕症耶？吾師曰：家貧不能服藥，孫真人云：亦不治也。若要病痊，非藥資十千文不可，其工價每月止三百文，何得不死？戴姓曰：病若可痊，吾代出十千文，亦周全一命。吾師曰：吾當代賒，如十千之外，吾代償可也。卽進以濟生腎氣湯原方，熟地六錢，山萸肉二錢，丹皮錢半，山藥二錢，茯苓四錢，澤瀉二錢，車前二錢，牛膝錢半，肉桂一錢，附子一錢。服二十劑，面色轉紅，腹腫漸消。吾師曰：再服前方二十劑。而腹膨足腫俱已退盡，諸恙霍然。吾問師曰：小兒童身，純陽之體，前後共服桂附八兩，如炭投冰，四十劑不更一味，而病霍然，神乎技矣。師曰：脹之一症，宜分虛實，臟腑上中下，最爲準的。若健脾利水，是崇土制水法。脾土不能制水，土被水淹，水泛滔天，一息真陽被其淹沒，用濟生腎氣水中取火，蒸動腎陽，而消陰翳。保真陽而泄水邪，爲開渠泄水法。水去而土稍旺，火旺土得生氣，自然胃氣甦，脾運健，而水有所制矣。若專以崇土築堤，恐堤高水溢，漲至胸膈，水無出路，氣喘不休，其症危矣。所以方藥對病，如指南之針，心中斷不可疑惑。倘服三四劑不效，卽更他方，病深藥淺，往

往誤事。吾令其服四十劑而病可痊，胸中早有成竹也。

濕溫

常熟靈公殿楊府一小使，周姓，無錫人，年十八九。壬午七月間病後，至八月間，又勞碌反覆，發熱面紅，脈沉氣促。有汪姓醫以爲虛陽上脫，服以參附，熱更甚，脈更沉，汗出不止。邀余診之，以脈沉面赤氣促論之，却似戴陽。視其正氣，斷非虛脫。太常楊公曰：虛實惟君一決。余曰：待余再診，方可直決。再診之，面目俱紅，口中氣臭，小便短赤，脈沉滯而模糊不清。余曰：此乃濕溫化熱，被參附阻於氣機，熱鬱不能分泄，逼陰外出，故反汗多氣促。楊公曰：實熱有何據。余曰：仲景試寒熱在小便之多少赤白。口中氣臭，斷非虛熱。溫涼執持不定，必致僨事，若不用寒涼藥，症必危矣。楊公不能決。余卽書黃柏、木通、梔皮、鬱金、薏仁、通草、苓皮、竹葉、滑石、杏仁、藿香令服之。明日復診，熱退汗止而神倦。余卽以香砂、白朮、二陳之類令服之。楊公曰：昨寒涼，今溫燥，何也。余曰：濕溫症熱去濕存，陽氣卽微，再服涼藥，必轉吐瀉。昨以寒淡滲熱，今以苦溫化濕。服三劑，濕亦退。後服香砂六君五六劑而痊。症非危險，若執持不定，因循人事，仍用參附，不死何待。

曹秋霞，卽余習藥業之師也，頗知醫理。庚申移居於太平洲，其母年逾六旬，發熱不休，面紅目赤，進以

芩、梔等，熱仍不解，再以生地、石斛大劑寒涼，其熱更甚，徹夜不寐，汗出氣喘，症已危險。邀吾師診之。吾師曰：治病宜察氣候，上宜此處，四面臨江，低窪之鄉，掘地不及三尺，即有水出，陰雨日久，江霧上騰，症由受濕化熱，濕溫症也。如物受潮，鬱蒸化熱，常曝以太陽，其濕一去，其熱自清。進以寒涼，是濕蒸之熱，沃以涼水，添其濕，即助其熱矣。內經云：燥勝濕，寒勝熱。濕淫所勝，平以苦熱，以苦燥之，以淡泄之。進以茅朮二錢，乾薑一錢，厚朴一錢，赤苓一兩，薏仁一兩，黃柏錢半，豬苓三錢，桂枝一錢，車前二錢，滑石五錢。必須多服盡劑，方能退熱。病家因熱甚，不敢服。吾師曰：熱而不煩，渴而不飲，舌苔黃膩而潤，脈來模糊帶澀不利，皆濕熱之明徵也。若再服寒涼，必致發黃，或吐嘔，或下利，則不可救藥矣。促而飲之。日晡時飲盡一大碗，至天明，熱退身安，即能安寐。吾師曰：五方異治，地有高下，濕溫一症，風高土燥之處，未曾見慣，苦燥溫熱之品內，有味淡泄熱、苦寒化熱以制之，即丹溪二妙法也。雖重劑亦無妨，有幾分病，進幾分藥，並非孟浪亂投重劑也。蓋藥必中病而已。

呃逆

常熟慧日寺傷科劉震揚，始因濕溫發疹，其人體豐濕重，醫進以牛蒡、山梔、連翹等，已有十餘日。邀余診之，脈來澀滯不揚，舌薄白，神識如蒙，冷汗漉漉不斷，身有紅疹不多，洩少而赤，呃逆頻頻，症勢甚危。

余曰、肥人氣滯，濕邪化熱，瀰漫胸中，如雲如霧，充塞募原，神識昏蒙。況呃之一症，有虛實痰氣濕血寒熱之分，不可專言是寒。鄙見看來，上焦氣機阻逆，斷不可拘於丁香柿蒂之法，先立一清輕芳香，先開上焦，佐以降逆泄熱。進以蘇子梗、藿香梗、通草、鬱金、沉香屑、杏仁、茯苓、薏仁、佩蘭、半夏、橘皮、薑竹茹。另研蘇合香丸汁頻頻呷之。服後神氣日清，診七八次，皆進以芳香苦泄淡滲法，而熱退呃平，乃愈。此症若誤疑呃逆爲虛寒，投以溫補，立斃。所以看病當看全局，遇兼症併病，宜先立一着實主見，自不致眩惑彷徨。然非臨證多者，不克臻此。

暑風痧厥

常熟大東門外余義大店夥，余姓，年五十餘，因暑天到潯浦，舟中受熱受風，是晚回店，發熱極盛，至晨，脈伏肢厥，二便皆秘，遍體無汗，項背几几，體寒。邀余診之，曰：風襲太陽之表，暑濕熱鬱於裏，急宜開表通陽，遲則恐成剛痧。葉天士曰：通陽莫如通小便。使膀胱一開，一身之陽氣皆通。即進以五苓散，每服五錢，煎沸湯一大碗飲之。飲兩次，小溲通暢，而汗出脈起厥回，體轉熱矣。此症雖輕，如作熱深厥亦深，投以沉寒涼藥，危矣。故誌之以示後學。

暑溫

暑溫風溫熱病，最忌大汗傷陰、苦溫傷液、溫補助熱，俱可化火，爲害最烈。葉天士曰：溫邪傷液，急則變爲瘵厥，緩則變爲虛勞。前輩屢試之言，洵不誣也。余見一某姓子，平素陰虛內熱，是年壬午，君火司天，溫邪極甚，六月間得熱病。琴川有一四時風寒通套之方，豆豉、牛蒡、山梔、厚朴、枳殼、連翹、陳皮、山查、半夏、赤苓、通草、蟬衣、杏仁之類，熱甚者加入鮮石斛、鮮生地等品，不大便則加瓜蒌仁、元明粉，或加涼膈散兩許，無論四時六氣，皆從此方加減。某醫卽以此方加減進之。然暑必夾濕，燥則化火，涼則濕凝，而甘淡微苦之法，全然不知。以致病人津乾舌絳，脘阻便澹，汗多。見其因表致虛，某又進參、芪、熟地、杞子、杜仲等溫補之品。不知補則礙氣助熱，聚濕填中，病在垂危。延月餘，邀余診之。脈虛細而芤，舌絳如豬肝，汗出氣促，不得平臥，手指戰振，灼熱津乾不渴，咳嗽痰多，溲澀，已有緩變虛勞之勢。余曰：此症古人云：不服藥爲中醫，若再服藥，危矣。病家曰：此不治之症耶？余曰：非也。暑爲陽邪，濕爲陰邪，天地之氣也。清邪先中於上，肺先受之，暑濕交阻，蒸化爲熱。用藥若涼，則依濕一面而化爲寒，必轉便澹痞滿冷汗。用藥若溫，則依暑一面而化爲火，必轉唇焦舌黑，瘵厥等症。故前輩治暑邪之方，最難着筆，要清熱而不礙濕，化濕而不礙熱者，惟有劉河間之天水散、三石湯，吳鞠通之清絡飲、三仁湯，如補而不助熱，不

聚濕，則孫真人之生脈散，此諸方皆暑症之要方也。雖然平淡，却能消息於無形之間，以輕能去實也。又以甘涼淡滲、清熱存陰、微苦泄熱等輕劑，服五六十劑之後，病家問曰：「若專於清輕之劑，病人正氣，恐難支持，亦可服大補否？」余曰：「人之養生，最冲和者，莫如穀食。既然熱清胃甦，飲食大增，不必拘於溫補。然熱病不服溫補，斷不能收全功，直至十一月，方能服異功散、歸脾湯之類而愈。」

暑犯厥陰

人言醫不認錯。醫豈有不錯之理，錯而合於理，情猶可恕；錯而不合於理，不徒不自知其錯，反自信其不錯，斯終身陷於錯中而不悟，其罪尚可問乎？余治常熟水北門葉姓婦，素有肝氣胸痹。發時腕痛，屢進瓜蒌、薤白、半夏、枳實，一劑更衣即平，屢治屢驗。是年夏杪，此婦雇船下鄉，回城受暑濕而見寒熱，胸腕阻格作嘔。戴姓醫進以胃苓湯，加藿香、蘇梗。此方亦屬不錯，而服之反甚。邀余診之，脈滯而沉，汗冷作嘔，腕中作梗，按之甚痛而拒按。余視此症，乃熱邪挾濕內陷，爲小陷胸症無疑，進小陷胸湯法一劑。明日更重。診脈仍滯不起，舌灰潤，作嘔頻頻，湯液不入，胸中格如兩截，拒按作痛，且譫語言澀不出，汗冷撮空。余竟不解，問病家曰：「大便何如？」曰：「大便已溏數日。」余思小陷胸湯已錯，又屬太陰症矣，即進四逆加人參。余思此症下利虛痞，作嘔肢寒，顯然濁陰上犯，雖不中病，諒亦不遠，即將此方與服。余歸即

細心思之，因憶溫病條辨下焦篇中，有暑邪深入厥陰，舌灰，心下板實，嘔噦，寒熱下痢，聲音不出，上下格拒者，有椒梅湯法，此症頗切。黃昏病家至寓云：服藥似乎肢溫汗少，神識仍蒙，作嘔，便澹不止。余曰：將二次藥煎好，以仲景烏梅丸四錢，將藥汁煎化灌之。服後胸膈漸開，利止嘔平，而能安寐。明午復診，神清言爽。余即將烏梅丸原方改作小劑，服兩劑痊愈。醫學一道，豈易談哉。戴姓之胃苓湯，似未必錯，胸中拒按，余之小陷胸，亦切病情，乃皆不合。四逆加參，似錯而反不遠，合以烏梅丸，竟克兩劑而痊。藥不中病，百劑徒然，藥能中病，一劑而安，仲景書豈可不讀哉。

戰汗

常熟旱北門外孫祠堂茶室婦，始因溫邪未能透徹，延之四十餘日。邀余診之，脈細數鬱於內，着骨始見，肌枯肉削，乾燥灼熱無汗，熱亦不甚，耳聾舌強，言語澀塞不清，澁少，大便泄瀉如醬色，舌色底絳而上有烟煤之色，眼白珠淡紅，鼻乾不欲飲，手足痠動。余曰：此乃溫邪深入於裏，汗未透徹，此症當戰汗於骨髓之間，若不戰汗，熱不得泄，陰液燦盡亦死。若戰汗不出亦死。且先以甘涼重劑養肺胃之陰，以作來日助其戰汗之資，故先進生地、麥冬、元參、石斛、梨汁之類一劑，肌膚較潤，泄瀉亦稀。復診，進以大劑復脈湯，加鷄蛋黃二枚調服，生地黃一兩，阿膠三錢，麥冬六錢，生白芍三錢，炙甘草二錢，石斛六錢，

生牡蠣一兩，煎濃汁服。余曰：此藥服下，令其安寐，不可擾亂，到天明時如能冷汗淋漓，手足厥冷，目反口張，遍體冷汗，切勿驚慌呼喚，倘戰不透，亦死症也。若服此藥汗不出，腹膨無汗，此正不勝邪，戰汗不出，亦不治矣。日晡服下，至四鼓，果然遍體冷汗，脈靜肢冷，目反不語。舉家因余預囑，故靜以待之，直至日中，汗收神醒，熱退瀉止。後服甘涼養胃，存陰泄熱，數劑而愈。所謂戰汗者，熱伏於少陰厥陰肝腎之間，要從極底而出，故服大劑甘涼鹹寒，使其下焦地氣潮潤，而霧氣上騰爲雲，肺氣滋潤，天氣下降爲雨矣。若遇此等症，專於止瀉發汗清熱，必不能保全也。

冬溫咳痰

常熟瞿橋倪萬泰染坊何司務，於庚寅除夕得病，寒熱咳嗽痰多，他醫進以豆豉、梔子、杏仁、萸、貝、蛤殼、茅根之類，更劇。一日吐出稠膩之痰數碗。辛卯正月初四，邀余診之。脈緊肌燥無汗，咳喘痰白如膠，日吐數碗，脇痛。余曰：此乃寒飲停胸，再服涼藥，卽危矣。進小青龍湯原方，略爲加減，重加桂、薑。服三劑，症忽大變，猝然神識如狂，舌紅口燥，起坐不安，卽食生梨兩枚。明晨又邀余去診，症似危險，診之脈緊已鬆，口渴舌紅，又已化火，陽氣已通，可保無虞。後轉服化痰潤肺之劑，仍每日吐稠膩白痰碗餘，十餘日後，再服六君子等和胃藥十餘劑而愈。庚寅冬溫，愈於溫藥者多，死於涼藥者廣，然亦要臨症活變。

斷不可拘執也。

濕痹

常熟大市橋王姓，年二十五六，面色青黃，足腫如柱，脹至腰，腰重不能舉，足軟不能行，其父背負而至。余問曰：此症起於何時？答曰：已一年有餘，服藥近二百劑，鮮效。余診其脈，澀滯不利，下體腫脹，足弱不能行，腰重不能舉，余曰：此症雖未見過，揣其情，卽黃帝所謂緩風濕痺也。金匱云：着痹，濕着而不去，腰中如帶五千錢。千金云：腳弱病，總名謂之腳氣，甚則上衝心腹，亦能致命。此症服補劑，往往氣塞而閉者甚多，服攻藥而死者，未之有也，斷不可因久病而補之。余進以活命檳榔飲方：橘葉四錢，杉木片一兩，陳酒三兩，童便二兩，水二碗，煎至一碗，調入檳榔末二錢。服後將被溫覆而臥，遍身汗出如洗，腫退一半。再服一劑，汗後腫卽全退，足漸能步履。復診，更本事杉木散方加味：杉木片五錢，大腹皮二錢，檳榔二錢，橘皮、橘葉各二錢，防己二錢，附子四分，酒二兩，童便二兩，服三劑，病痊。其父曰：藥價極廉，不及百文，四劑卽能愈此一年餘之重症，神乎技矣。余曰：藥貴中病，不論貴賤，在善用之而已。古人之方，不欺後學，所難者中病耳。如病藥相合，斷無不效驗者。

久痛入絡

諸痛之症，當分氣血寒熱臟腑經脈，斷不可籠統而混治之。邵鏡泉，浙江會稽人，在常熟南門開合泰槽坊。始以正坐，有友與之嬉，猝自後壓其背，當時無所苦，後數月，咳嗽吐痰，其痰似乎從背脊上行，由肺咳吐而出也。旋腰間絡脈如束帶，收緊作痛，繼則腹中攻痛，已而筋鬆痛舒，以手按之，不拘腰腹，其氣卽阻於掌下，而痛更甚，按久則掌下高突，氣聚不散，而痛勢更甚。伊服七厘散傷藥之後，自此痛勢不休，手按於何處，掌下卽痛，腰中收束之痛，一日夜十餘次，已有年餘。後有醫進以附、桂、杞子、鹿角、杜仲、黨參等，服二十劑，不熱不脹，痛勢依然。邀余診之，述其病情。余曰：氣攻腹中，痛後卽散者，難經云：氣之不通，爲聚爲癥。癥者假也，或有或無。聚者氣之所聚，或聚或散。久痛則入絡，氣竄於絡，被瘀阻不通則痛。用手按之，掌下高突者，絡中氣至不能流通，其氣聚於掌下，似覺皮膚高突也。手去則氣道通而痛平。腰間如束帶，收之則痛，鬆之則舒，此乃久痛傷絡，累及奇經帶脈之隧道，被氣血阻滯，氣行至此，不能通達，故脈絡俱收緊，引東牽西也。吐出之痰，似乎在背脊胸脇肩臂諸經絡出者，絡虛則津液滲入，多服熱藥，則煎熬成痰，此經絡病也。軀殼病也，氣血病也，與中宮臟腑毫不相干。若服熱藥，反助火爲痰，呆滯氣血。以余鄙見，當從仲景蟲蟻搜剔之法，細審鱉甲煎丸，卽知其法，當先服指迷茯苓丸二

兩，作六天服，先去絡中之痰。服後痰咳漸少。後以地鱉蟲一個，地龍一條，蟪蟲一個，蜣螂一個，僵蠶三條，鼠婦六個，六物炙脆爲末。以絲瓜絡一錢，橘絡一錢，絡石藤錢半，三味炙炭爲末。以別直參一錢，沉香三分，降香三分，檀香三分，木香三分，鬱金三分，六味俱用酒磨汁。又以青蔥管一尺，韭菜根五錢，二物搗汁。又以紅花五分，當歸二錢，新絳五分，懷膝尾錢半，四味煎濃汁。用陳酒二兩，將各汁和透燉溫，冲服前末。服三劑，痛去其半。後以原方加穿山甲錢半同煎，又加黃鱔血二錢冲和服。服四五劑，痛減八九。後以理氣和榮通絡之劑，調理而愈。

戴陽

常熟東門外葉泳泰布行一童子，名錦蘭，年約十二三，吐瀉止後，卽就余診。兩尺皆伏，惟寸關脈浮，汗多氣促。余曰：此症大有變局。進以和中分清芳香淡滲之品。至明日又邀余去診。汗如珠下，面紅目赤，肢厥脈伏，口中要飲井水雪水，煩躁不休。余曰：此症陽已外脫，若認爲熱症，一服寒涼卽死。若畏其死，卽無法矣。病家人曰：聽君所爲，死不怨也。余曰：吾開方後，不可再請他醫，因他醫以余方爲是，死則歸罪於彼，若以余方爲非，而更立一方，死則其罪愈不能辭。症旣危險，死生不如余獨肩其任。卽以乾薑一錢，附片一錢，肉桂八分，豬膽汁一錢，童便二兩，三物先煎，將汁濾清，和入膽汁，童便，沸一二次冷服。

此症本可用白通四逆加人尿猪膽汁爲是，因症已危險，故去參、草之甘緩，恐其奪薑、附之功，加以肉桂之辛，如猛將加以旗鼓，萬軍之中，以奪敵幟。不料時已在哺，膽汁、童便俱無覓處。病家先以薑、附、桂三味煎而飲之，欲將膽汁、童便明晨再飲。余聞而大駭，卽送字與其父，曰：薑、附、桂陽藥，走而不收，一誤猶可，膽汁、童便陰藥，守而不走，再誤不可，一服卽死。明晨速卽將原方照服，或可挽回萬一。明晨果照方服一劑。至午，余又去診之，汗止，口渴亦止，面目紅色亦退，脈細如絲而已見。余曰：脈已微續，可無慮矣。卽進四逆加人參、人尿。再一劑而病霍然。吾友曰：如此酷暑，十餘歲小童，服如此熱藥，倘一挽回不轉，其咎何辭。余曰：不然。爲醫者當濟困扶危，死中求生，醫之責也。若懼招怨尤，袖手旁觀，巧避嫌疑，而開一平淡之方以塞責，不徒無以對病者，卽清夜自問，能無抱慚衾影乎。

脫症

吾幼時在孟河天寶堂藥舖，曹煥樹先生之門下習業。其弟魯峰，素有咯血症，是年十月，忽起寒熱，頭痛身疼。治以桂枝、葛根汗之，寒熱已盡，漸能飲食。停一日，忽然面紅汗出如珠，神靜脈浮而無力。卽請馬培之先生診之，服藥依然。至晚汗出更甚，莫可爲計。至二更，余看醫宗金鑑少陰戴陽一條，卽謂煥樹先生曰：魯峰叔之病，與戴陽相合，急宜引火歸元。煥樹恍然悟曰：此陽脫症也，非溫納不可。因其素

昔吐血，最懼陽藥，故畏縮而不敢專用，倘一差失，殺吾弟矣。余曰：陽無陰不斂，當陰陽並顧，與其不治而死，不如含藥而亡。卽以熟地四兩，黨參四兩，黃芪四兩，附子三錢，肉桂三錢，煎汁，加以童便三兩，分三服。先進一服，靜待半時，無所變，再服亦然，三服已盡，汗仍不收，面赤不退，不寐不煩不脹。後治法已亂。曰：既能受補而無他變者，恐病重藥輕故也。再濃煎別直參二兩服之，又不脹。再以紫河車一具，東洋參二兩，煎濃汁服之，約一時許，汗收，面紅漸退而安寐。至明日始醒，宛如無恙。後費伯雄、丁雨亭先生診之，曰：此等治法，出乎醫理之外，非自己爲醫不可。費伯雄先生曰：昨日陽脫而救陽，今日陽回當保陰，卽服甘涼鹹寒養陰之品，十餘劑而愈。余見古書有云服參數斤者，於此益信古人之自有此法也。

陰陽並脫

丹陽貢贊溪，在琴開豆腐店，始以溫邪，有王姓醫專以牛蒡、豆豉、柴胡、青蒿等，已服十餘劑，陰液已盡，陽氣欲脫，狂躁咬人，神識昏憤，瘵厥皆至，舌黑而縮，牙緊不開，病已陰絕陽亡。余卽進以復脈法，去薑、桂，加雞蛋黃大劑灌之。不料明晨反口瞪口張，面青肉僵，脈沉而汗出如珠，四肢厥冷。余曰：陰回戰汗，陽不能支，欲脫矣。不必診脈，先炊鑪燃炭，急以桂枝龍骨牡蠣救逆法大劑，別直參三錢，白芍三錢，甘

草一錢，龍骨四錢，牡蠣一兩，淮小麥一兩，紅棗三錢，茯神二錢，煎之。先灌以粥湯，含不能嚥，即將藥煎沸灌之，稍能嚥，緩緩盡劑。不料至晡汗收而遍體灼熱，狂躁昏厥，舌黑津枯。余曰：陽回則陰液又不能支矣。仍進復脈去薑桂法，生地一兩，阿膠三錢，麥冬五錢，白芍三錢，炙草一錢，麻仁四錢，雞蛋黃二枚。服後至明晨，依然汗冷肢厥脈伏，目瞪口呆，張不言語。余曰：陰回則陽氣又欲脫矣。仍服前方桂枝救逆湯。至晡依然舌黑短縮，脈數灼熱，仍用復脈去薑桂法。如是者三日，症勢方定。此症陰脫救陰，陽脫救陽，服藥早溫暮涼。若護陰和陽並用，亦屬難救，故不得不分治也。後服甘涼養胃二十餘劑而愈。治此症余挖盡心思。余素性剛拙，遇危險之症，斷不敢以平淡之方，邀功避罪，所畏者蒼蒼耳。

上下並脫

同道徐賓之，金陵人，住常熟西門，始而寒熱，繼則下痢紅白，三四日後重不爽，小便少而澀。白服藥數劑，不效，邀余治之。舌面白，舌心舌邊俱剝而紅燥，脈來滯而不揚，進以胃苓湯意，理氣而泄濕熱。一劑，溲澀後重俱爽，紅積止而見薄糞，猝然遍體汗出如珠，自寅至酉而起坐言語飲食，一如平人。惟大便溏薄，日瀉二三次，並不後重。自戌至寅，四時中煩躁汗多，額與指尖均冷，撮空囁語，喜怒之狀不一。或以爲祟。余曰：此乃陽脫之症。躁而不煩，是陽氣虛竭，即以附子理中合桂枝加龍骨牡蠣法，急守中陽，

以固表陽，人參三錢，於朮四錢，附子一錢，白芍一錢，桂枝二錢，龍骨三錢，牡蠣一兩，炙草一錢，乾薑一錢，紅棗五枚。服之，入夜仍拈衣摸床，囁語汗出。明日原方再加重三成，加五味子五分。一服後汗收神清，陽回痢止，即飲食漸進，已能出外。因藥貴停服六七日。後服亂方黃芩三錢，白芍三錢，服兩劑，仍煩躁不休，冷汗淋漓，大便水瀉，遍體如冰。再服扶陽固表，已無救矣。噫，生死雖曰天命，豈非人事。醫究有理可評，黃芩苦寒，白芍泄脾，既自爲醫，反服亂方，其死宜哉。

虛斑亡陽

常熟閣老坊范雲亭，是年暑天，先因寒熱，遍體紅斑滿布，延某醫治之，進以牛蒡、山梔、豆豉、厚朴、枳殼、涼膈散、石斛、生地、沙參等，琴川所謂三鮮湯加減是也。服五六劑，遍體冷汗淋漓，神識尙清，脈沉細，目珠上反，喉間痰聲漉漉，氣促咳嗽痰多，項背反折。是日請醫七人，有用鮮生地、石斛、大黃、芒硝者，有用豆豉、牛蒡、山梔、連翹者，有用草果、厚朴、蒼朮、陳皮者，有用附子、人參、熟地、阿膠者，各有主見，議論紛紛。七人之中，余不在焉。余至，各醫均散。余診之，曰：脈微欲絕，冷汗淋漓，陰凝於內，陽脫於外。舌底絳白潤而灰，下焦濁陰水氣，皆泛於上。再拘執紅疹宜服寒涼，陽即脫矣。若進枳、朴、蒼朮香燥者，亦決無是理。惟溫補似乎合符。然熟地、阿膠，有痰飲阻格，決不能入，不如以甘溫固表扶陽，參以酸斂之品收之，服

一劑。明日邵聿修先生到琴，應有卓識。立方用黨參、茯神、棗仁、桂枝、白芍、炙草、炒淮麥、五味子、煨薑、紅棗。病家及旁人皆不肯用黨參。余曰：此症當大服人參，既不相信，改北沙參可也。服一劑，如故。至晨，邵君到，卽書字來寓，邀余並診。余曰：先將昨方換人參，加龍骨、牡蠣，再服一劑，診脈可也。聿翁曰：龍骨、牡蠣，前方已加，服過一劑，人參未也。余曰：何以不用人參？邵君笑而不答。余曰：君乃常昭之仰望，若亦依順人情，而仍用北沙參者，雲亭無生理矣。豈可比余之人微言輕乎？聿翁曰：用人參若干？余曰：此症人參宜以兩計，然方上却難寫，不如先用一錢，餘使病家漸漸增進。卽將原方去沙參，換人參一錢。服一劑，罔效。聿翁要往梅里，委余代看一日。余曰：代理一天猶可，如日久恐病家不信，豈不誤事？邵君去後，明日病人大汗如雨，痰升作厥。余曰：卽服獨參湯一味，以救其脫，另用五味子、枯礬二味，研細末，以人涎唾調爛，納入病人臍中，用膏藥蓋之。是日共服人參七錢，並未作脹。明晨汗稍收，氣漸平，口中白糜布滿。明日聿翁到琴，並診之，斟酌一方，當捨表救裏，不能顧其紅斑，擬十四味建中加減主之，人參一錢，黃芪三錢，茯神二錢，炙草一錢，五味子五分，於朮二錢，附子一錢，肉桂八分，乾薑五分，白芍錢半，熟地四錢，杜仲四錢，杞子三錢，紅棗五枚。煎服一劑，無效。原方再服一劑，忽覺泄瀉，脈變外浮。聿翁曰：此症難矣。脈浮汗出，陽從上脫，又見泄瀉，陰從下脫，陰陽兩脫，又加白糜滿口，痰塞咽喉，不死何待？余曰：病勢雖危，尙有一線生機，能服人參兩許，兼以大補之劑而不脹，服葇附、桂而不燥，尙有正氣能支，有

陰分可燦。今脈沉而轉浮者，乃陰脈轉陽脈也。大便溏泄者，乃服溫藥行動先所服涼藥之積也。仲景太陽篇，有寒積太陰，陽動則腐臭穢不能內留而下者，即仲景桂枝加芍藥條之文。然寒積遇溫而下，不過兩三日，若下之三日不止，汗更出，脈仍沉濡肢冷，則死定矣。如下之能汗收脈緩思飲，至第三日而痢止，即有生機矣。乃謂雲亭之弟仲和曰：余二人之力，不勝此病，宜再請高明。仲和曰：醫禱俱窮，二公再推諉，無他望矣。生死由命，決不怨也。即將前方去熟地，加白芍二錢，乾薑五分，再進一劑。口中化燥，脈仍浮而痢更甚。以原方再服一劑，痢止，略思飲食，精神稍振。即將前方桂、附、薑、芍減半，加熟地、黃肉，另服獨參湯。又兩日，病已大有起色。聿翁回支塘，余爲調理月餘而痊。所調理之方，皆歸脾、四君、生脈、桂枝加龍骨牡蠣、小建中諸法加減出入。此事已有五六年，刻下聿翁已作古人。今夏初有人來邀去，雲亭病重。即過診之，病已七八日，一日數醫，所服皆牛蒡、山梔、豆豉、連翹、琴川三鮮湯、枳、朴之類。診其脈沉而下痢，痰聲漉漉，汗冷，瞳神無光，陰躁。余曰：前次爲涼藥所誤，不料今次又依樣葫蘆，惜哉。即寫別直參三錢，附子一錢，乾薑一錢，於朮三錢，炙草一錢等服之，如水投石。余曰：難矣，即起聿修於地下，亦無濟矣。如此陽虛烟體，正虛邪陷，用清涼剋伐而有生理者，未之有也。延三日而逝。

陰斑瀉血

壬午七月，余至琴川，吾友沈芝卿勸余施診。八月間，溫熱大行，病診甚多，每日應接不暇，至臘月初五，因年事催迫，欲回孟河度歲。是晚與芝卿同飲於醋庫橋。芝卿曰：吾腿上起紅斑，已有兩日，並無所苦。余視之，兩股兩脛及手腕等處，起紅斑如豆如粟，視肌膚稍高，色微紫而不鮮澤，有時作癢。諒由冬天溫熱，風熱所致。當時開一辛涼解肌之方。初六早解纜啓行，過揚厘之西塘市，河冰泊舟五日凍解，一路耽擱，至十九日到常州。接得吾友胡少田之信，云芝卿病重。余半載未歸，歸心如箭。至二十日，又接到少田信，云芝卿病危，卽速回琴。斯時雪深冰堅，余卽寄裝於怡芬泰茶行，負絮被一條，趁航至錫山，連夜過航至琴川，到已十二月廿三日午後矣。一見芝卿，形容十分狼狽，囚首喪面，色亦黧黑，髮根上逆，大便血利滑瀉，手足拘束，如同桎梏，身上紅斑，皆聚成塊，大骨節處及肩胛、尺澤、足膝、環跳、足脛等處，俱結紅色一塊，坐不能臥。余亦爲酸鼻，卽細問其病之始末。病家曰：初六日身起紅斑，亦無所苦。至十一日，卽胸中痞悶而嘔，且有寒熱。延裴姓醫，進以高良薑、兩頭尖、吳萸、紅豆蔻、官桂、香附、乾薑等味，兩劑後覺胸中更阻，大便秘結。至十五日，大便後猝然下血甚多。自此每日下血下利，斑疹漸收，聚於骨節，而手足拘曲，寒熱亦止。至今七八天，日夜下利無度。余診其脈細而弦緊，舌苔白滑而潤。余細思之，斑由冬溫而來，熱阻胸中，肺氣不宜，則氣逆而嘔。被裴姓醫辛熱大劑，劫動血絡，陰絡受傷，血從下溢。大便血後，血不能養筋，則筋拘束不伸。正氣下陷，則斑疹隨之而收束，聚於骨空節節之處而成片。

檢近日所服之方，皆槐花、地榆、山查、銀花、枳殼之類。余思此症，乃失表症也，若以人參敗毒散服之，逆流挽舟，冀其斑透而痢止。服人參敗毒散後，果能得汗，斑疹結聚，散布滿體，痢仍不止。再服依然。雖屬知己，余亦難自專主，即邀王簡修診之。用常歸赤小豆散加槐花、地榆之類。又邀沈心田診之，進以阿膠、地黃之類。皆在陰分一邊，方俱難以愜意。余再診其脈，仍如前，舌白不化，下利清穀，血脫則氣亦脫，血脫先固氣，當服溫補，似乎合符，故王沈二君之方，俱未敢服。徹夜思維，服溫補又恐有礙紅斑，然陰斑虛疹，亦不忌溫熱，況事已如此，完穀不化，湯藥入腹，即滑而出，斷無再服陰藥之理。當捨表救裏爲是。先進以四君子湯加木瓜、黃肉等消息之，調以赤石脂、米汁。服後即滑脫而下，亦無所苦，惟面紅目紅，夜不能寐，舌滑口和，俱少陰之見症。他醫皆云下血太多，陰不斂陽，不如清熱養陰。余專主此事，總不能聽各醫眩惑，若不升陽固氣，利斷難止。余進以重劑附子理中湯，黨參五錢，白朮三錢，乾薑一錢，附子一錢，炙草一錢，紅棗五枚。煎汁服之，雖無所苦，而舌轉乾黃，渴而不能飲。各人皆謂藥不對症。余曰：治病當有藥主，其權在我。若再服寒涼，豈有生理。再服原方一劑，舌苔又轉焦黑，捫之如炭，脈仍沉遲不浮，面紅目赤，夜仍不寐。余心焦灼，即着人請支塘邵聿修先生。時正天寒雪厚，邵先生不能來城。廿六日，年事匆匆，再服理中湯一劑。黑苔皆剝，舌變乾絳色，胃氣稍甦，利亦稍稀。余曰：陽分已回，稍顧其陰，原方加入生地、阿膠。服後利又甚，舌轉薄白。余曰：陰藥不能進，陽回而無依，如之奈何。二十八九

日，又加呃逆，仍服附子理中，加以丁香、代赭，去陰藥不用，而利稍減。訪得東鄉丁姓醫，頗有名望，遣人請之。是日已大除夕矣，余思元旦無市，即開單買藥十餘種，參、朮、附、桂、苓、草之類，配而與服。服三劑，至正月初二，利已止。丁姓醫到，看前診諸君之方，無一不錯，惟用山梔、連翹、桑葉、杏仁、蟬衣、蘆根之屬，謂此症極輕，服兩劑，再邀復診可也。病家親戚輩，見此症面紅目赤，舌絳而乾，涼藥最宜，心中反咎余用溫熱之藥，口雖不言，而色見於面。余曰：既請丁君到此，不服其藥，心必不甘，況丁君之言，津津有味，姑且煎好，服少些試之。先服一杯，便覺寒戰，舌轉白潤，作嘔不休，利下又甚。余即進以理中湯，嘔止。病家仍不信余，再服丁藥半杯，舌仍轉潤薄白，而嘔又至。余曰：虛陽上戴，假熱無疑。至初三夜，邵聿修先生到，診之曰：舌乾而絳，下血極多，血脫則氣亦脫，若專服陽藥，陰液何存，陽無所依，陰躁即見，豈能久持。斟酌一方，用歸脾湯合黃土湯去黃芩，陰藥少而陽藥多，可保無妨。余亦以爲然。邵先生即時返棹。照方煎服，病人云：覺背脊中寒涼。而藥仍從大便流出。余曰：聿修先生爲常昭兩邑醫生之冠，無出其右者，投劑無效，眞束手無策。然既能納溫補，祇能仍歸溫補，即進以鹿角、杜仲、枸杞、附、桂、黨參、冬朮、炙草、乾薑、巴戟、紅棗大劑。服三劑，利止，面紅目赤仍不退，夜仍不寐。至初六卯刻，猝然冷汗如浴，呃逆頻頻，連續不止，已見欲脫之象。余曰：難矣。按脈仍沉而不浮，汗出如冰，此時亦無可奈何。余即以附子三錢，別直參一兩二錢，煎濃汁，作三次服，已刻服一次，不覺脹熱，申刻服二次，汗稍收，呃亦減，亥刻服三次，

盡劑。又另煎潞黨參四兩，終日飲之，至盡劑，汗收呃止，而能安寐，面目紅色亦退，從此轉機。後噯氣不休，是胃中新穀之氣，與病之舊氣相爭，服仲景旋覆代赭湯十餘劑而平。此症舌乾而黑，目赤面紅，且兼血利，能專主溫補，一日夜服別直參一兩二錢，黨參四兩，附子三錢者，幸病家能信余而不疑，而余亦能立定主見而不移，若一或游移，進以寒涼養陰之品，不死何待。雖雪深三尺，日夜躊躇，衣不解帶者半月，亦勞而無功。此治病之所以當胸有成竹也。

陰斑熱陷

常熟大河鎮道士王少堂，六月初偕妻回里，十四日起寒熱，遍體紅疹滿布。周姓醫進以辛涼解肌之方，服後病增，至十七，病更劇。其岳母邀余診之。脈極細而微，重按至骨，微見數象，神識頗清，遍體乾燥，身無點汗，舌絳無津，而又不渴，言語輕微，躁不能寐，紅斑密布無空隙之處。余思此乃正虛邪陷之陰斑也。余曰：初十晚到家，逐日所作何事，試一一述之。曰：十一至十三做法事，十四日懺事畢，結帳後當夜即熱。余曰：再去問之，初十有房事否。答言有之。初十日酷暑，坐船數十里，外風襲表，暑熱偏蒸，至夜慾後，氣脈皆虛，熱邪即乘虛內伏。加之十一至十三，身為法官，終日厚衣，汗出不止，汗多則外陽已虛，津液亦涸，腠理空豁。又高叫勅令，中氣亦虛，熱邪易入，故見寒熱。又被寒涼之藥遏其陽氣，故內熱雖

甚無陽氣蒸動，無津液化汗出表。若再服寒涼，表陽愈虛，熱陷更深，陰斑無疑矣。用仲景桂枝湯加乾薑、人參，重用甘草，服後再飲以米湯。余思汗多則陽弱陰傷，以桂枝湯和其表，以乾薑合桂枝護其中陽，假甘草之多甘，合米飲之穀氣，甘淡以助其胃津，得乾薑之熱，蒸動其胃津以上升，又賴桂枝之力推之出表，若得汗出，則中陽動而表陽和，內伏之邪亦可由外表而發。待其煩躁狂叫，或奔走越垣，方爲佳兆。切不可與以涼藥，恐火鬱不能外達也。如服此藥後，仍然不變，則難治矣。服藥後，明午果然神識漸狂，聲高而起，坐不安，渴已能飲。病家驚惶，飲以蔗漿一碗，依舊靜臥，聲微脈細。至二鼓，余至其家，問之曰：「今午漸狂，聲高渴飲，不料服蔗汁後依然如故。」余曰：「正欲其陰症轉陽，由裏出表，陽回而煩，方爲佳兆。又爲寒涼所遏，事屬周折。仍從原方加臺參，鬚服之。」明午，又見煩躁能飲，以溫水飲之，汗出脈起矣。再進以甘涼之品，生胃陰而泄熱助汗，託之外出，汗透而神靜安寐，脈亦轉和緩，能思飲食。余曰：「汗後肌潤，脈和思食，正能勝邪，病有轉機矣。陽回以養陰爲要，進以生脈法，加甘涼鹹寒之品，數劑而痊。然症似少陰，究非傷寒可比，此是外邪內伏，無陽氣陰液化汗以達表。所以讀傷寒者，知有是病，即有是方，兩言盡之矣。」

腹痛肝厥

常熟西弄徐仲鳴幼女杏寶，年八歲，始以寒熱腹痛瘳厥，經某醫以牛蒡、豆豉、枳實、檳榔等味，無效。又經一醫以石斛、珠粉、鈎藤、羚羊、石決等味，腹痛瘳厥更甚，腹痛即厥而瘳，痛平則瘳厥亦止，一日夜三四十次，症已危險。黃昏邀余過診。其脈細而微弦，舌心焦黑，舌邊乾白，目眶低陷，神倦音瘳，兩目少神，腹痛瘳厥，時作時止，身無寒熱。余細思熱病瘳厥，當神昏而腹不痛。若是寒厥，四肢厥冷，祇有轉筋而無瘳。此乃腹痛瘳厥並見，定是寒熱陰陽雜亂於中。夫溫病之厥，關乎手厥陰者，多宜寒涼。寒病之厥，關乎足厥陰者，多宜溫涼並進。此症皆不離厥陰一經。先煎仲景烏梅丸三錢，連渣灌下，越一時即吐出白痰半碗，再服，又吐白痰半碗，再服再嘔，約服藥汁三分之二，而腹痛瘳厥亦止，即能安寐。明日復診，舌黑亦潤，喜笑如常，惟腹中略痛而已。余即進以烏梅丸原法，再服小劑一劑，即飲食如常矣。

症犯厥陰

壬辰二月，余治常熟青龍巷口錢姓婦，始因肝氣寒熱，他醫進以破氣消導發散，而致嘔吐，氣上衝心，由下焦上升，即昏厥不知人事，氣平則醒。邀余診之。余曰：嘔吐氣上衝則厥，此是風邪犯於足厥陰肝經，破氣溫中，俱無益也。當以烏梅丸三錢，煎化連滓服。服後嘔吐即止，氣衝亦平，再調以平肝降逆之劑，二三劑而瘳。大市橋孫姓婦，亦脘痛，氣衝胸膈，則肢厥神昏，嘔吐額汗。余以烏梅丸三錢煎化服之，

氣衝厥逆漸平，後服仲景黃連湯加吳萸，三劑即痊。此二症皆春天少陽風熱之邪，誤服破氣消導寒涼等品而入厥陰者，所以病入於裏，徒事發表消導無益也。

厥陰傷寒

常熟署刑席沈魯翁之僕人某，始因深冬受寒，猝然寒熱身痛，某醫與以消導發散藥兩劑後，即少腹氣衝撞心，心中疼熱，面紅咽痛，夜間煩躁，嘔吐痰涎粘膩，盈碗盈盆。據云已有六七日，腹痛上衝，即有欲厥之狀。魯翁邀余診之，備述病情。余曰：厥陰傷寒無疑矣，無怪發表攻裏俱罔效也。脈雖細弦，尚有微浮，兼有太陽未盡之表症。少腹氣撞胸脘欲厥，嘔吐粘涎甚多，心中疼熱，咽痛面紅煩躁，厥陰症已具，陽氣被真寒外格。擬當歸四逆湯加吳萸、生薑加味主之。立方：當歸三錢，桂枝錢半，白芍二錢，細辛四分，半夏二錢，薑川連四分，吳萸四分，炙草五分，通草一錢，大棗六枚。先煎化仲景烏梅丸三錢，連滓服下，以平肝安胃而止厥，再服前方湯藥散其寒。照方服兩劑，諸症悉減。再以仲景黃連湯法吞烏梅丸，加減出入三四劑，病去六七。後以小建中加參、椒、梅等加減，服十餘劑而愈。此症若因咽痛面紅煩躁而服清涼，必死。即浮泛不中病之方，亦難保全。柯氏云：有是病即有是方，洵不誣也。

痙厥

常熟百歲坊戴姓女鳳鳳，約十八九歲，在靈公殿前曾府爲使女。時正酷暑，飲井水兩碗後覺胸中痞悶，明晨忽腹中氣上衝痛，痛則痙厥，目珠上反，角弓反張，四肢抽搐，時厥時甦，一日夜五十餘次。前醫作熱厥，服以涼藥，昏痙抽搐更甚。因貧不能服藥，束手待斃。余曰：藥資余不吝，然生死不能保也。病家曰：生死由天，求君救之。余心惻然，即進以至寶丹一粒，蘇合香丸一粒，研細，菖蒲汁調服。再用針刺風池兩穴，期門兩穴，虎口兩穴，肺俞兩穴。無效而痙厥更甚。余細思終夜恍然悟曰：熱時飲冷，陽氣內伏，陰寒阻格於上，陽欲升而不能，陰欲散而不得，陰陽之氣逆亂於中，犯脾胃則爲吐瀉，犯肝膽則爲痙厥。仲景肝膽同體，每以溫涼並用。昏厥痙者，皆陰陽之氣逆亂於中者多，用藥亦須溫涼駁雜，方克有濟。此症在厥陰之表，少陽之裏，着筆當在厥陰少陽二經，即擬桂枝一錢，羚羊二錢，乾薑五分，川連四分，吳萸四分，鈎藤三錢，木瓜二錢，天麻一錢，僵蠶三錢，竹瀝一兩，石決一兩，薑汁五分。煎好緩緩服盡，氣平痛止，即能安寐，痙厥抽搐俱平，後服調肝脾藥二十餘劑而痊。余貼藥資三千餘文，愈此危症，亦生平一快事也。

食厥

常熟星橋石姓嫗，晨食油條一支，麻糰一枚，猝然腕中絞痛如刀刺，肢厥脈伏，汗冷神昏。余診之曰：食阻賁門，不得入胃，陰陽之氣，阻隔不通，清陽不能上升，濁陰不能下降，故揮霍撩亂，窒塞於中。宜用吐法，以通其陽。用生萊菔子三錢，藜蘆一錢，橘紅一錢，炒鹽五分，煎之，飲後以雞羽探喉吐之，再以炒鹽湯飲之。吐二三次，痛止肢溫，厥回汗收。惟噁心一夜，乾嘔不已。余曰：多嘔胃氣上逆，不能下降，以烏梅丸三錢煎化服之，即平。後服橘半六君子三四劑而愈。夫初食之厥，以吐爲近路，其陽可通，若以枳實、檳榔等消食攻下，其氣更秘，危矣。

氣厥

常熟大東門陶姓嫗，暮年傷子，肝氣久鬱，又因有一人抵賴其子賒出之賬，兩相執持，陶姓嫗猝然跌倒，氣息全無。急邀余診，脈來沉伏，目上反，口鼻之間，呼吸氣息全無，手足厥冷，其勢已危。余曰：此乃肝鬱氣秘，痰阻靈竅，藥不得入，惟用至寶丹、蘇合香丸各一粒，用竹瀝、薑汁、菖蒲汁、藜蘆煎汁一杯，將諸汁和入灌之，以雞羽三四支探喉，吐出白膩痰甚多，氣息稍通。片刻後，又氣息全無，再飲再探再吐。如

是五七次，痰雖多而氣仍不轉。余疲甚，直至五更，氣漸轉而能呼吸，天明已能言語，咽痛三四日，調理而愈。余思木鬱則達之，吐即達之意也，如此症不用吐法去其痰通其陽而能救者，吾不信也。又有百歲坊朱姓姬，因口角動怒，猝然昏厥不語，脈伏肢冷，呼吸不通。余即用炒鹽湯，用雞羽探吐，一哭即醒，醒則大哭不止，此鬱極則發之也，如天地鬱極，則雷霆奮發之義。余見肝厥、食厥、氣厥等症，惟有吐爲最速耳。所以吐之一法，不可棄而不用也。

肝陽吐血

常熟大東門外，吾友謝蔭庭，辛卯六月間，忽大吐血，每日約有碗餘，半月不止。某醫進以犀角地黃湯，加羚羊角、山梔、生地、石斛大涼之劑，罔效。半月以來，已有氣隨血脫之狀。飲以井水亦不止。是夕三鼓，邀余診之。脈來沉細，目瞑聲低，言語輕微，肢冷汗冷，面紅煩躁，欲寐不能寐。余曰：事急矣。氣隨血脫，陽隨陰脫，速宜引陽入陰，引氣納腎。先將陳酒十斤煮熱，浸其兩足兩時許，再以生附子錢半，元寸五厘，蓖麻子肉七粒，擣如泥，貼左足心湧泉穴，立方以中生地一兩，元參四錢，麥冬四錢，蒲黃炭二錢，阿膠四錢，生龜版一兩，石斛六錢，生牡蠣一兩，生石決一兩，懷牛膝二錢，茜草炭二錢，煎好，再以鮮柏葉、鮮荷葉搗爛絞汁，入童便一茶杯，或秋石一錢化水同沖，一氣盡服之，血即止。後服沙參、麥冬、梨、藕、石斛

甘涼養胃，數劑而愈。其友問余曰：前醫進犀角、羚羊角、生地、石斛等，可謂寒矣，何以半月不能止其血，今方服之即止，何也？余曰：實火宜涼，虛火宜補，此乃肝陽挾龍雷之火上騰，況吐血已多，陽隨陰脫，下焦之陽不安其位。方書云：在上者當導之使下，陳酒、附子是也。鹹可下引，介可潛陽，童便、阿膠、龜版、牡蠣、石決是也。甘涼泄熱存陰，生地、麥冬、元參、石斛是也。清血絡，引血歸經而止血，鮮柏葉、荷葉汁是也。若專服寒涼，是沸油中潑水，激之使怒，豈能望其潛降乎？

膽汁不清

浙江某大令徹夜不寐，已有年餘，就診孟河馬省三前輩，用黃連八分，豬膽汁一錢拌炒山梔三錢，煎服，當夜即寐。大令曰：余服藥近二百劑，安神養血，毫無效驗，何以一劑而能平年餘之疾乎？省三曰：此因受驚，膽汁上泛而渾，少陽之火上升不潛，故不寐也，當用極苦之藥降之，使膽汁清澄，故取黃連之極苦，降上僭之陽，取山梔清肝膽之熱，以膽汁炒之者，欲使其直入膽中也。膽熱清，則膽汁亦清，其理甚明，並非奇異。大令曰：疾果因受驚而起，夜與友手談，櫟上鼠忽跌落在盤，子散滿地，散局而臥，即不成寐，先生真神醫也。前輩醫道，豈後學所能望其項背乎？此症丁坦庵先生親目見之，今特誌之。

熱極似寒

夫熱極似寒之症，最難辨別。余診同鄉趙惠甫先生之孫卓士，是年九月間，忽起嘔瀉，邀余診之，進以芳香理氣，淡以分泄。至明日，舌苔白而轉紅，脈滯而轉滑，嘔吐已止，再進以辛涼甘淡，存陰泄熱。至黃昏忽然發狂，持刀殺人。至明日，闔家無策。余曰：熱透於外，非瀉不可，即進以三黃石膏法。黃連三錢，黃芩五錢，黃柏三錢，大黃二兩，石膏二兩，梔子五錢，淡豆豉五錢，煎濃汁兩大碗。余曰：多備而少飲，緩緩作數次服之。服一杯，即瀉稀糞，又服一杯，又瀉稀糞，連服四杯，連瀉四次，神識稍倦，狂躁略減，藥已盡過半矣。扶之使睡，囁語不休，如癡如狂。即進以存陰清熱之劑，生牡蠣四兩，元參二兩，麥冬二兩，細生地二兩，金石斛二兩，鮮竹芯一兩，石膏二兩，竹瀝二兩，鮮沙參四兩，大劑灌之，即能安寐。明日醒，仍囁語，神識或渾或清，後每日服竹葉石膏湯一劑，西洋參錢半，麥冬五錢，石膏一兩，鮮竹葉四錢，薑半夏錢半，生甘草一錢，知母三錢，粳米二兩。此方共服二十餘劑，而神氣亦清，囁語亦止。此症共服石膏二十餘兩而愈。病由嘔瀉而起，內經云：熱迫下注則爲瀉，胃熱上沸則爲吐。所以嘔瀉一症，亦有熱秘嘔瀉，不可不防也。壬寅年之吐瀉，有服涼藥冷水而愈者。治病貴看症用藥，不可拘於成見。如時邪之吐瀉，泥於仲景之三陰症，用四逆理中等法，其誤事尙堪設想乎。

熱深厥深

常熟大東門龐家弄顏姓，因失業後室如懸磬，有病不能服藥。延六七日，邀余診之。脈沉如無，四肢厥冷，無汗，神識昏蒙，嚙語撮空，遍體如冰，惟舌底絳而焦黑，乾燥無津。余曰：此乃熱深厥深，陽極似陰，熱極似寒也。當時即進以銀花露一斤，再進以大劑白虎湯加犀角、生地、人中黃煎好，調服至寶丹、紫雪丹。罔效。明日再飲以銀花露二斤，仍服原方，犀角八分，生地一兩，石膏八錢，知母二錢，生草一錢，人中黃二錢，粳米湯代水，調至寶丹一粒，紫雪丹五分。服兩劑，如故。余思既是熱深厥深，有此兩劑，亦當厥回。如果看錯，寒厥服此兩劑，無有不死，何以不變不動？正令人不解。至明日復診，神識已清，肢體皆溫，汗出淋漓。問其母曰：昨日服何藥？曰：昨日服黃霉天所積冷水五大碗，即時汗出厥回，神清疹透。余曰：何以能知服涼水可以回厥？其母曰：昔時先伯爲醫，每晚談及是年熱症大行，服白虎、鮮石斛、鮮生地等往往不效，甚至服雪水方解。吾見先生服以銀花露三斤，大劑涼藥二劑，如果不對，宜即死，今無變動者，必係病重藥輕，吾故斗膽以黃霉水飲之，諒可無虞，誰知竟即時轉機。噫，余給藥資數千，不若其母黃霉水數碗也。孔子曰：學然後知不足。洵至言也。

治病之道，失之毫釐，謬以千里。余在師處，正值小暑之時，見一陳姓三歲兒，其母孀居，子係遺腹，偶有

腹痛不甚。請屠姓醫治之，以爲蟲痛，書花椒、乾薑、烏梅、吳萸、雷丸等。其母偕兒在藥肆中買藥，置小兒於地，兒將腹貼地，覆面而臥。余見之曰：「此孩暑熱入裏，腹中熱甚。其母不以爲意。不料此兒服藥後，即四肢面額俱寒冷，目睛上反，無汗，不啼不哭，脈伏氣絕。其母哭之甚哀。他人曰：『費蘭泉先生看過否？』其母曰：『未也。』即抱至吾師處，余代診之。脈伏肢冷，遍體如冰，目反氣絕，惟胸中尚熱，牙關緊閉。余不能解，告吾師曰：『昨見此孩覆地而臥，屠先生服熱藥，不料今日變症如此。』吾師再三細視，曰：『滿目紅絲，目珠上反，白珠屬肺，火刑金也。瞳神屬腎，目珠反白，腎陰竭也。此乃熱深厥深之症。因西瓜尚早，若有西瓜，猶可一救。』旁一人曰：『戴姓莊房西席，有昨在常州帶來西瓜。』吾師即付錢二百，請其覓得西瓜一枚，即絞汁，將牙關撬開，頻頻灌入。約兩時許，灌下瓜汁一碗，即進以人參白虎湯。西洋參三錢，生石膏八錢，知母二錢，生甘草一錢，粳米一兩，麥冬三錢，五味子四分。曰：『服西瓜汁後，可少緩進藥。』服後至四更，小兒始醒，啼哭數聲，又厥。明晨仍抱至寓中，余診其脈仍伏，目珠生翳，瞳神色白，惟四肢稍溫，肌膚微熱。吾師細看之，謂其母曰：『再服兩劑，可保無妨。』即將前方去石膏，加鮮石斛一兩，細生地五錢，元參三錢。服二劑，即厥回體和，瞳神轉黑，飲乳如常矣。余問師曰：『何以目白無光，斷其不死？』師曰：『五臟六腑之津液，被熱劫盡，精氣不能上輸於目，而無光矣。投以辛涼，火鬱發之，佐以甘寒，保其津液，胃汁以五味子之酸，收其元神，故津液可復，精氣上承，其目亦自明矣。』吾師曰：『不但此症。昔有小兒痢疾一年，他醫專

以枳、朴、檳榔、麩、查等消導攻積，後痢久兩目青盲，瞳神色白，以異功散、參苓白朮散調理收功，後目光漸復，已二十餘年，惟光線稍短耳。余至琴川張涇橋廟，有兩兒，一七歲，一十三，痢已半年，兩目青盲，瞳神色白，眼閉不能開，瘦削內熱，眼科施以陰藥，均不效。余曰：治痢爲先，痢止則目亦可明。投以四君子，以黨參換太子參、北沙參，加石斛、山藥、蓮子、紅棗等，服二十餘劑，兼服參苓白朮散末，每日三四錢，匝月痢止。陰虛內熱不清，服六味地黃丸，日久兩目白而轉黑，其光散而復收。治病必求其本，洵夫。

嘔瀉虛痞

常熟大步道巷余姓，年五十餘，素嗜洋烟，時正酷暑，忽嘔瀉交作。邀余診之，進以胃苓湯加藿香、半夏。明日嘔瀉均止，脈靜身涼，毫無所苦，惟神倦好寐，脘中堅硬，按之作痛拒按。病家以爲病愈。余曰：病入陰臟，微見乾噦，卽進大劑附子理中湯，加生薑之法，黨參五錢，白朮二錢，乾薑一錢，附子八分，炙草五分，薑汁沖服。一劑，覺脘中稍舒，再服一劑，而噦亦止，脘中已舒。吾友問曰：脘中拒按，何以反進參朮，實所未解。余曰：吸烟之人，素體本弱，又經大吐大瀉，斷無食滯內停，其脘中堅硬者，乃中虛濁陰蟠踞，虛痞於上也。霍亂之後，太陰必虛，法用理中，吐者加生薑，腹滿加附子，腹痛加人參，故輕用朮而加附子、人參、生薑，俾陽氣充足，濁陰自散，噦可止而痞滿自除。斷無大吐大瀉之後，而有實結胸者。

結胸

泰興太平洲王姓婦，始而發熱不甚，脈來浮數，舌苔薄白。因其初熱，投以二陳、蘇葉等，其舌即紅而燥。改投川貝、桑葉等，其舌又白。吾師蘭泉見其舌質易變，曰：此症大有變端。使其另請高明。王姓以爲病無所苦，起居如常，諒無大患。後延一屠姓醫診之，以爲氣血兩虛，即服補中益氣兩三劑，愈服愈危，至六七劑，即奄奄一息，脈伏氣絕。時正酷暑，已備入木。吾師曰：王氏與吾世交，何忍袖手，即往視之。見病人仰臥正寢，梳頭換衣，備人木矣。吾師偕余細看，面不變色，目睛上反，唇色尚紅，其形似未至死。後將薄紙一張，蓋其口鼻，又不見鼓動，氣息已絕。按脈亦絕。吾師左右躊躇，曰：未有面色不變，手足尚溫而死者。後再按其足上太衝、太谿，其脈尚存。曰：未有見足脈尚存，而手脈已絕者，必另有別情。即將其衣解開，按其腕中，石硬而板，重力按之，見病人眉間皮肉微動，似有痛苦之狀。吾師曰：得矣，此乃大結胸症也。非水非痰，是補藥與熱邪搏結而成，醫書所未載也。即書大黃一兩，厚朴三錢，枳實三錢，萊菔子一兩，芒硝三錢，瓜蒌皮一兩，先煎枳、朴、萊、蕪，後納大黃，瀘汁，再納芒硝，瀘清，將病人牙關撬開，用竹箸兩隻插入齒中，將藥汁漸漸灌入，自午至戌，方能盡劑。至四更時，病人已有氣息，至天明，稍能言語，忽覺腹中大痛。吾師曰：病至少腹矣，當服原方，再半劑，腹大痛不堪，下燥矢三十餘枚，而痛即止。後調以

甘涼養胃。因胃氣不旺，病家又邀屠姓醫診之，曰：被苦寒傷胃，卽進以薑、附等溫補之品，又鼻衄如注。仍邀吾師診之。曰：吾雖不能起死回生，治之轉機，亦大不易，爾何聽信他人乎？卽婉言謝之而去。嗟乎，有功受讒，亦醫家之恨事耳。

黃疸

陰陽黃疸，雖云難分，然細心辨之，最易分別。陰黃色淡黃而泛青，脈細肢倦，口淡舌白，小溲雖黃，而色不甚赤。陽黃如橘子色，脈實身熱，舌底稍絳，苔膩黃厚，汗黃溲赤。雖諸疸皆從濕熱始，久則皆變爲寒濕，陰黃亦熱去濕存，陽微之意也。惟女勞疸治法，看法俱異耳。又有肝氣鬱則脾土受制，肝火與脾濕，爲熱爲疸，又非茵陳、薑、附、梔子、大黃可治，此又在調理法中矣。余同窗鄒端生患黃疸日久，孟河諸前輩始從濕熱治之，進以黃柏、茵陳、四苓之類，不效。余適有事至孟何，診之，脈細，色淡黃而青，舌白口淡，進以薑、附、茵陳、五苓、合香燥之品，數劑而愈。此余未習醫之時也。後有茶室夥，黃疸三年，亦以前法服三十劑而愈。有肝鬱黃疸，忽然嘔吐發熱，遍體痠痛，熱退則面目俱黃，此宜從疏肝理氣，利濕健脾自愈，又不可用溫熱也。又有脾虛氣弱，面目淡黃，用參、苓、白朮等，服十餘劑自愈。夫黃疸之症，始則濕熱，而濕爲陰邪，最易化寒，濕家又最忌發汗。余治黃疸數百人，用大黃、梔子者，百中僅有一二，用苦溫淡

滲芳香之品，雖誤無妨。余每見誤服梔黃，即噁心泄瀉而胃憊，若誤汗，即見氣促汗多，因而債事者多矣。治黃疸症，如欲汗欲下，當千斟萬酌，方可一施耳。

脾泄

昭文廣文楊鏡翁云，其兄脾泄便澹日久，服藥無效，後有醫傳一方，云以山芋一個，約半斤，用黃土調爛包好，置竈內煨熟，去泥去皮食之，每日一個。依法行之，約食三四月，而脾氣已健，大便亦堅。余思山芋一物，色黃而味甘淡，氣香黃屬土，甘入脾，淡去濕，以土包之，以土助土也，以火煨之，以火生土也。此等平淡之方而去疾者，妙在空靈，直在有意無意之間耳。爲醫立方，能到如此平淡，亦不易耳。

濕聚便血

常熟阜北門李姓婦，始以泄瀉鮮紅血，顧姓醫進以白頭翁湯，服後洞瀉不止，純血無度。邀余診之，脈沉欲絕，冷汗淋漓，舌灰潤，色如烟煤，肢冷畏熱，欲飲不能飲，言語或蒙或清。余曰：下痢純血，議白頭翁湯，亦未嘗不是。然厥陰下痢純血，身必發熱。太陰濕聚下痢純血，身必發寒。太陰爲至陰濕土，非溫燥不宜，兼之淡以滲濕爲是。擬胃苓湯加查炭、炒黑乾薑一劑，尙未回陽，而神識稍清。再進白朮二錢，猪

苓二錢，赤苓二錢，炒薏仁四錢，查炭三錢，澤瀉二錢，桂枝一錢，炮薑五分，藿香一錢，薏仁五分，荷葉蒂三枚，薑棗服之泄瀉已止，痢血亦停，漸漸肢溫汗收，神識亦清。後將原方更改服二三劑而愈。此症本不甚重，此方亦不甚奇，若拘於方書，誤用寒涼，難免呃逆、虛痞、嘔噦、汗冷、肢逆、惡候叢生，往往不救。甚矣，辨症之難也。

便血傷脾

吾友鄒培之，便血三年，脾土極虛，面浮足腫，色黃，胃氣索然，精神極疲。稍服清劑則瀉，稍服補劑則脹，稍服清利則口燥舌乾，用藥難於措手。丁雨亭先生曰：每日用黃土一斤，清河水五六碗，煎沸澄清，候冷去黃土，將此水煎茶煮粥。依法試行一月，脾土稍旺，飲食稍增，便血亦減。再服二三月，諸恙大減，浮腫俱退。後服健脾養血化濕等劑數十劑而愈。余問曰：黃土一味，此方出於何書？丁雨亭先生曰：仲景黃土湯治便血，重用黃土爲君藥。土生萬物，脾土一敗，諸藥不能尅化，取黃土色黃而味淡甘，以土助土，味甘入脾，色黃入脾，味淡滲濕，濕去則脾健，脾健則清升，此乃補脾於無形之中，勿以平淡而忽之，蓋平淡中自有神奇耳。

不食不便

太倉沙頭鎮陳厚卿，爲人儉樸篤實，足不出戶，身體肥胖，是年秋，覺神疲肢倦，胃納漸減，平昔可食飯三碗，逐漸減至碗許。延醫治之，進以胃苓湯、平胃散、香砂、枳、朮之類。後邀支塘邵聿修先生，以爲胸痹，進薤白、瓜蒌等，不效。後又延直塘任雨人先生，進以參、苓、白朮等，亦無效。四十餘日未得更衣，二十餘日未食，脈見歇止。雨人曰：病久脈見結代，五日內當危。舉家驚惶。吾友胡少田，卽厚卿妹丈也，邀余去診之。余見病人毫無所苦，惟脈三息一止，四息一止，而不食不便。余曰：人之欲死，其身中陽氣必有一條去路，或氣促大汗，或下痢不休，或神昏陷塌。今病人一無所苦，五日之危，余實不解。脈之結代，以鄙見論之，係服燥藥淡滲之品太多，腸胃枯澀，二十餘日未食，四十餘日未便，無穀氣以生血脈，血脈乾澀，不能流利，故脈見結代也。未必竟爲死症。余立一方以附子理中合建中法，通陽布陰，滑利腸胃，黨參五錢，於朮四錢，炙草一錢，乾薑八分，附子四分，桂枝五分，當歸四錢，白芍三錢，淡苳蓉五錢，枸杞子四錢，飴糖五錢，紅棗五枚，鹿角霜五錢。旁人見方譁然曰：此方非食三碗飯者，不能服此藥。且四十餘日未大便，火氣熱結，再服桂、薑、附，是益其燥也。余曰：因其不能食，自然要服補藥，因其大便不通，自然要服熱藥，如能食飯，本不要服補藥，能大便，本不要服熱藥，藥所以治病也。豈有能食能便之人，而妄

服藥者乎。人皆以余爲妄言。余曰：余在此候其服藥，如有差失，自任其咎，與他人何涉。衆始不言。照方服後，稍能食稀粥。旁人曰：昨日之方太險，宜略改輕。余諾之，將原方桂枝易肉桂，鹿角霜易毛角片，黨參換老山別直參。衆人閱方曰：不但不改輕，且反改重。七言八語，余甚厭之。曰：延醫治病，其權在醫，旁人何得多言掣肘。又服兩劑，再送半硫丸二錢，已覺腹痛，大便稀水淋漓，三日夜共下僵硬燥屎四十餘節，每節二三寸，以參附湯助之，大便之後，服歸脾湯而愈。後旁人問余曰：大便既四十餘日未更，而服如此熱藥，反能通者，何也。余曰：人之大便不通，如河道之舟不行，氣不暢者，如舟之無風，當服以理氣藥。如河中水涸，舟不得行，當進以養血潤腸藥。如河中草穢堆積，當服以攻積導滯藥。如有壅礙阻塞，當服以軟堅攻下藥。此症乃河中冰凍不解，不能行舟，若不服以溫藥，使暴日當空，春回寒谷，東風解凍，其舟斷不能通。陰結之症，非溫藥安能奏效。若云大便不通，卽服攻下之品，此人人能爲之，延醫何爲哉。

大便秘結

常熟西門虹橋葉姓婦，正月間血崩，經蔡潤甫先生服以參、芪等補劑，血崩止。余於二月間到琴，邀余診之。胸腹不舒，胃呆納減，余以異功散加香砂、香附等進之，胸膈已舒，胃氣亦甦，飲食如常矣。有四十

餘日未得更衣，是日肛中猝然大痛如刀刺，三日呼號不絕，精神困頓。有某醫生謂生臟毒肛癰之類，恐大腸內潰。後邀余診，余曰：燥屎下迫，肛小而不得出，即進枸杞子、菴蓉、當歸、麻仁、柏子仁、黨參、陳酒、白蜜之類大劑飲之。明晨出燥屎三枚，痛勢稍減。後兩日肛中大痛，汗冷肢厥，勢更危險。他醫以爲肛中潰裂。余曰：如果肛中潰裂，何以不下膿血。經曰：清陽出上竅，濁陰出下竅。此乃清氣與濁氣團聚於下，直腸填實，燥屎迫於肛門，不得出也。當升其清氣，使清陽之氣上升，則腸中之氣可以展舒，而津液可以下布。蜜煎、膽汁雖潤，亦不能使上焦津液布於下焦。進以大劑補中益氣湯加菴蓉、杞子煎濃汁兩碗服之，又下巨糞如臂，並燥屎甚多，肛中痛已霍然。後服參苓白朮散十餘劑而愈。

小便癰閼

常熟大河鎮李姓婦，孀居有年，年四十餘，素體豐肥，前爲爭產事，以致成訟，鬱怒傷肝，後即少腹膨脹，左側更甚，小便三日不通。某醫進以五苓、導赤等法，俱無效。就余寓診。余曰：此乃肝氣鬱結，氣滯不化，厥陰之脈繞於陰器，繫於廷孔，專於利水無益，疏肝理氣，自然可通。立方用川棟子三錢，青皮二錢，廣木香五分，香附二錢，鬱金二錢，橘皮錢半，官桂五分，蔥管三尺，濃汁送下通關丸三錢。一劑即通。明日來寓，更方而去。所以治病先求法外之法，不利其水而水自通，專於利水而水不行，此中自有精義存

焉，非淺學所能領略也。

常熟西鄉大市橋宗福湖，小便不通，延醫治之，不外五苓、導赤、通草、滑石之類，無效。已十三日，未能小便，少腹高硬作痛，汗出氣促，少腹按之石硬。余進通關法，加地黃，重用肉桂，一劑而通。洩仍未暢，少腹兩旁仍硬，臍下中間三指闊已軟。余曰：此陽氣未得運化也。進以濟生腎氣湯大劑，少腹以葱薑水熏洗，三日洩暢如前。內經云：膀胱爲州都之官，氣化則能出矣。若專於利水，而不挾以溫藥，則愈利愈塞矣。

遺精

老吳市陸少雲，遺精三四日一次，已有三年，養陰固攝俱罔效。余診之，脈細肢倦，神疲形寒。曰：初起之遺，在相火不靜。日久之遺，在氣虛不固。而龍骨、牡蠣之固攝，但能固其精，未能固其氣。治其病當固其氣於無形之中。進以韭菜子二錢，杞子二錢，菟絲子三錢，黨參三錢，於朮二錢，鹿角霜五錢，桑螵蛸三錢，黃芪三錢，仙靈脾錢半，巴戟肉二錢，炙草一錢，紅棗五枚，煨薑兩片。服三劑，覺身體輕健，四肢漸溫，胃氣亦旺。服至十劑，則遺精已止矣。

男子陰吹

女子陰吹，金匱治以髮膏煎，即猪膏亂髮也。此因胃氣下泄，陰吹而正喧，乃穀氣之實也，故將此膏導之。此症金匱載在婦人雜病門。不料此症男子亦有之。孟河有一男，前陰莖中溺孔有氣出，如轉矢氣而有聲，兩年餘亦無所苦。前輩張景和先生診之，曰：男子陰吹無須藥，候猪行屠戶殺猪時，去毛之後用刀刮下之皮垢，即名猪膚，將水漂淨，曝乾，將陰陽瓦用炭煨灰存性，研細，以陳酒每服三錢，三四服即痊。此方亦髮膏煎所蛻化也。今之用猪膚者直用猪皮，誤矣，其實膚外之垢也。

脫肛奇治

吳門某紳子，患脫肛載餘，出二寸，不能收，痛苦萬狀，百藥不效。就診華墅姜姓醫，將銹鐵三斤，濃煎沸湯，置便桶內熏洗之，再將活吸鐵石二兩，煎濃汁飲之，其肛漸漸吸之而上。再服升提補托之品，調理月愈而痊。所以爲醫者，讀書之餘，又須廣其見聞，此法可爲巧奪天工矣。

溫補成消

常熟南門大街衣店有某成衣，因暑濕瘡愈後，經王簡修專於溫補，服鹿角、巴戟、參、朮、附、桂之類數十劑，又將前方加參、芪、杞子、杜仲等大劑膏滋藥一料，胃氣甚強，一日能啖飯十八九中碗，約米二三升，身體豐肥，面色黧黑，大便燥結，小便黃赤，臨臥食飯三四碗，至明晨又饑，已有一年。就診於余，問其病由，因述始末，爲啖飯太多，欲胃納減少耳。余曰：此乃胃熱殺穀，痰火盤踞其中，當以大劑甘涼清肺胃，豁痰熱。此症爲緩症，當以緩劑治之。溫補聚熱而成消，故消而不渴也。不須服藥，每日服梨汁、蔗漿三中碗，大約以一斤半爲度。服三四日，腹卽作瀉，瀉出紅水甚多，且熱甚。連服連瀉十餘日，胃納少減，再減梨漿、蔗汁一碗。又服十餘日，連瀉十餘日，啖飯祇有十餘碗矣。余曰：以每日三餐，約一餐三碗，可止服。至月餘，所啖每日不過八九碗矣。所以甘涼緩治之法，雖輕而不傷胃氣，此等處不可不知。余亦從費伯雄先生食參目盲案中悟出耳。

食參目盲

人身無病，不可論藥，一日服藥，十日不復。余幼在孟河見有服參誤事者，今誌之以昭後戒。有一廣東鄭姓，在申營業，將上好人參二兩，用老鴨一隻，洗淨，以人參二兩納鴨腹中，煮而食之，五日後，覺目光模糊，十日後，卽兩目青盲，不能視物。就診費伯雄先生，述其緣因。曰：五臟六腑之精，上輸於目，因食參

太多，氣機遏塞，清氣不能上蒸，精氣不能上注，故盲也。內經云：益者損之。時正在仲秋，孟城青皮梨甚多，伯雄先生曰：不須服藥，每日服梨汁一碗，使大便每日利二三次。服十餘日，兩目見物，至一月，兩目復元，能察秋毫矣。治法雖極平淡，非伯雄先生做不到。余後治常熟北鄉某，年約十六七，體本豐盈，父母恐其讀書辛苦，兌人參兩餘，服後，其童忽變癡狀，所讀之書，俱不能記憶。余診之，脈弦實而滑，問其言，但微笑而已，面白體肥，不知何病。其父細述服參情由。余曰：能容各物者，其氣必虛。其體本實，再充而益之，氣有餘，卽是火，煎熬津液爲痰，清竅充塞不靈。卽用化痰清熱之品，以損其氣，而其補自消，進以羚羊、川貝、竹黃、竹瀝、膽星、山梔、菖蒲、遠志、連翹、白金丸之類，再飲以蔗漿、梨汁等。服數十劑，神氣日清，讀書亦能記憶，然神情應對，總不若未服參前之玲瓏也。噫，愛之適以害之，爲父母者，不亦難哉。又顧吉卿子，自小在李軍門長樂處，亦多服補藥，至十六七歲，知識尙未大開，亦多服補劑之害也。又一入久瘧，脾虛足腫，服別直參一兩，當夜卽斃。此脾弱不勝補也。又一女子發瘧，口渴索飲，適有桂元參湯，卽取半碗與飲，明日卽斃。此皆補藥之害也。故藥能中病，大黃爲聖劑，藥不中病，人參亦鴆毒，服藥者可不慎乎。

藥積

孟河有一人，面黃腹膨足腫，喜服藥，每日服藥一劑，方能安寐，無論寒熱攻補之劑，服之皆宜。後孟河賈先生診之，用茯苓八兩，桂枝一兩，煎湯十餘碗，令其欲飲則飲，欲洩則洩，必一夜服盡。洩出如屋漏水，色兼紅紫，而腹膨足腫俱消，再服異功散等健脾之劑，而病霍然。諸醫不解，問之。賈先生曰：此藥積也。問用苓、桂何意。賈先生曰：病積在腑，藥爲無形之積，當洗其腸胃，滌而去之，並非奇法也。此事費蘭泉師親目見之，故囑余誌之。

陽虛目疾

太平洲沈姓，以賭博爲生，終年徹夜不寐，兼嗜烟色，後眼白泛淡紅色，目珠少光，至清晨則如行雲霧中，日晡至天明，燈光之中，視物明亮如故。就診吾師。吾師曰：晨暗夜明，是陰盛陽衰，虛陽上僭。天地惟火能燭物，水能鑑物，晨暗而夜明，是火不能燭物，清陽之氣不能上升，當服補中益氣湯。十餘劑後，服歸脾湯十餘劑而愈。內經云：五臟六腑之氣，上輸於目，而爲之精，精之精爲瞳子。何臟虛，宜治何臟，徒退熱清熱無濟也。

膈内生蟲

余在師處見吾師診太平洲萬安橋陳姓婦，年三十餘歲，膈中時痛時止，痛時如針刺，止則亦無所苦，飲食如常，二便亦利，肌肉瘦削。吾師曰：上膈空曠之地，無有形質之物可停，寒食閉塞，又不能飲食如常，既飲食如常，又不當肌肉瘦削，若云寒氣痛，痛在絡中，未必時痛時止，且痛如針刺，一定是食管有蟲粘住不下，在至高之處。殺蟲等藥，又不能及，若以末藥，又恐粘入食竅，填塞不通，有妨飲食。宜設一涌吐之法，不知可能得效否。囑病家停三日再來取方。吾師乃窮思三日，得一吐法。先令病人以魚肉等佳味下飯，使其食之極飽，再以香油煎蛋，煎之極香，使病人坐在煎蛋之爐前，吸煎蛋之香氣，又以蔥汁熏之，再令病人將所煎之蛋食下，約三枚，病人飽不堪言，再以雄黃五分，花椒三分，藜蘆五分，爲細末，調服之後，飲以炒鹽湯，以雞羽攪喉探吐，使其胃中穀食傾湧而出。探三次，胃中所食水穀，探之淨盡，以烏梅安胃丸一錢，煎湯止嘔。所吐之水穀痰涎半桶，以清水淘淨，揀出蟲二十餘條，形如年魚，頭闊尾銳，色紫有黑點，旁有兩目，中有一口，其蟲軟而能伸縮，見風片刻卽死，究不知何名。吾師云：此由食馬蝗子粘在食管而生。食人血肉，久則長大，阻塞食管，而成痛格。所語亦想當然耳。然食管生蟲，余所目擊，若非吾師之巧思，雖讀書萬卷，亦徒然耳。孟子曰：大匠能與人規矩，不能使人巧。誠哉是言也。

桃葉吐痰

余見吾師治一痰癰，終日喜笑怒罵，高歌狂喊，力能逾垣走遊街市，已有八九月。或時吐痰，神識稍清。吾師曰：痰久則堅而難出，雖消痰化熱徒然，當用吐法以傾其痰窠，作癰疾治之。將鮮桃葉一二斤搗汁，和水灌之，用鷄羽探吐，吐出堅痰，連吐四五次，吐出粘痰數碗，又吐出痰塊三枚，堅凝如卵，色青光亮。病人吐後，覺胸膈煩熱，進以甘涼清熱，化痰潛陽，二十餘劑，神識大清，調理半月而愈。余患三瘡，將近四月，服蜀漆及檳榔，亦吐出粘涎兩三碗而愈。吾師用吐法最多，並不執於瓜蒂、梔子，雖吐法一例，而隨證施法，巧奪天工。今人於吐法廢而不用，仲景六法中已少一法矣。

尸厥

常熟縣署前星橋楊小溪妻，因母喪歸寧，事畢而回，是日即神識如蒙，默默不語，語則所與言者，皆已亡人也，與食則食，與洩則洩，飲食二便如常，與其言則不知也。已有十日，邀余診之，脈亦平穩，氣色如常。余曰：此非病也，病人必有異夢，病名尸厥。先以蘇合香丸研末吹入耳鼻中，再調如糊，塗膏肓、胸膈之間，再飲以蘇合香汁，使其安寐。再煎服後藥，虎頭骨、龍齒、鬼箭羽、硃砂、琥珀、腰黃、鬼臼之類，和入蘇

合香丸。明晨病人云、卽速付轎錢、有人將轎送我回矣。遂醒、恙已霍然。左氏傳膏肓之疾、鬼語與醫語如出一轍、其信有之耶。鬼神難知、醫者祇就病論病可矣。

祟病

常熟北門外抓扒灣李姓婦、先因風溫、被某醫進以枳、朴、檳榔之類、燥藥傷陰、神識昏憤、耳聾煩躁。邀余診之、進以甘涼鹹寒存陰、芳香開泄。服三劑、神識已清、病已退。忽病人曰、卽速做道場、我等無暇在此等候。語畢、卽神昏不醒、忽然喜笑怒罵、或舌伸口外、或齒齟如食炒豆、或高聲謳歌、或細語唧唧、千態萬狀、按其脈則乍大乍小。余曰、此祟病也。先以鬼箭羽、硃砂、降香焚之、後以至寶丹一粒、蘇合香丸一粒、化開、菖蒲、鬱金汁調灌盡劑、神識方醒、病若失。所以陽虛則陰氣邪祟、乘虛憑之。內經立鬼牀、鬼哭等穴、未必子虛也。

遊魂

龐金時部曹之夫人屈氏、述昔時病久神虛、魂常離殼、不得歸舍。有日因其姑開帟、自覺房中飄然而出、至廳堂盤桓、廳中寂靜無人、所懸輓章輓聯、細細讀之、歸房、始覺身臥於牀、所讀輓章輓聯、仍歷歷

在目，以筆默之，一無差誤。夫魂者陽氣之精，正虛不能斂陽，神浮於外，不克內守。經曰：神去則死。若此魂不歸，則成脫症矣。

子痢

常熟寺前街李吉甫先生夫人，妊娠七月，痢下紅白。他醫治以利濕清熱分消，痢更甚，腸滑後重，一日夜百餘度。裴菊村前輩診之，意欲治以補中益氣湯，恐升提胎元，欲用溫補，又恐胎前忌熱。左右躊躇，邀余合診。脈滑利而少力，腹中氣機濕滯已通，舌絳滑無苔，頭眩耳鳴，虛熱。余曰：治病不在胎前產後，有病則病當之。內經云：陷者舉之。當用升提。脫者固之。當用酸澀。若再用通套利濕之方，恐胎元滑脫矣。擬補中益氣法，重用參朮，輕用升柴，再以木瓜、肉果、煨薑升提溫澀。服數劑，略稀。余曰：滑脫太甚，非堵截之法不可，即以參附湯調赤石脂末，仍服前方。見其舌紅漸漸轉白，舌燥轉潤。余曰：清陽已經上升，而能布津於上矣。痢勢漸減，再以五味子、木瓜、乾薑等研末和赤石脂，飯糊爲丸，每日用附子一錢，別直參三錢煎汁送丸四錢。服藥三十餘劑，每日痢下仍有十餘次，胃氣亦甦。分娩時母子俱全，然痢尚有六七次，再服異功參苓白朮等收功。吉甫曰：此兒定然熱體矣。余曰：母子同氣，豈有母能服熱藥之寒體，而子乃爲熱體乎。此兒三四歲時，有痰哮喘病，非溫不宜，母子同氣之言，洵不謬也。

胞阻

常熟長田岸某姓婦，妊娠四月，小溲點滴不通。某婦科進以鮮生地、龍膽草、青麟丸等寒涼之品，小溲秘之更甚，已有三日。余診其脈，沉細而澀，少腹脹痛。余曰：此胞阻也。被寒涼凝滯膀胱，無陽不能化氣而出。即將葱二斤，煎水熨洗少腹，略能小便。即進五苓散，桂枝一錢，猪苓、赤苓各二錢，澤瀉二錢，白朮二錢，研粗末，煎沸濾清飲之。仍不能通暢，而少腹痛勢稍減。將前方去桂枝、易肉桂一錢，服法依前，服後而小便大暢而愈。如曰胎前忌熱，專用寒涼，殺人在反掌矣。

胞壓膀胱

常熟花園浜王姓婦，妊娠九月，胞漿水已破之後，腹痛漿水瀝盡，小溲不通，已有三日，少腹不動。穩婆謂胎死腹中，或欲試手法，或欲下死胎方。邀余診之，見產婦神情恬淡，並無所苦，唇舌均紅。使穩婆按其少腹，溫而不寒，脈來流利，軟而無力。診畢，穩婆問腹中小兒能保全否。余曰：腹中小兒，酣睡未醒。穩婆曰：何以不動。余曰：因睡而未醒，故不動也。主人曰：腹痛三日，小溲不通，小孩不動，恐胎已死矣。請先生一斷之。余曰：此名胞壓膀胱，此方書所不載，必定是負重或跌仆而損胎元。又因坐蓐太早，氣掙於

下，胞壓膀胱，小溲不能出，溲阻而脹。兼之胎元下墜，兩相擠軋，不能轉動。如果子死，當唇紅舌黑，少腹作冷。按脈未離經，未至臨產之時，胎元斷斷不死。卽問產婦，曾否有負重跌仆之事。婦曰：三日前因有安息香兩支在地，俯之不能拾，乃跪而拾之，起時胞漿已破。余曰：胞壓膀胱無疑矣。可先將燈草刺鼻中，令產婦噴嚏，嚏則肺氣開，上竅通則下竅泄，而小便可通，再吸洋烟三筒，將其胎提起，以免擠軋子門。小便通後，可讓出地面，使小兒可以轉身，臨盆卽不難矣。問服何藥。余曰：不須服藥。主人曰：可服催生藥否。余乃進以胃苓湯加蘇梗，利水行氣而已。噴嚏之後，吸洋烟三筒，果然小便通暢，藥將沾唇，小兒已下矣。若依穩婆手法，或服下死胎方，母子豈能保全。主人曰：君之催生方極靈，將來可傳之於人。余曰：胃苓湯是受濕泄瀉之方，作催生方，誤事不小。其功不在藥，而在燈草洋烟耳。

胎前吐瀉

常熟支塘邵聿修先生，余忘年友也，醫道之識見心思，超人一等，而喜景岳、醫通兩書，偏於甘溫，其生平爲人，性直氣爽，不談人短，不攻同道，不恃己才，不恥下問，深可敬也。余每過之作長夜談，娓娓不倦。余有過，彼戒之，余有善，彼讚之。天不永其壽，喪我良友，余深惜之。前在范雲亭處會診，與余論醫，謂治病貴乎鎮靜，不可輕投藥石，治孕婦之病，尤宜加慎。前老妻妊娠七月，忽起吐瀉，腹痛不堪，舉家驚惶，

卽請穩婆。有曰欲小產矣，有曰欲坐草矣，有曰尙未及時，言語雜亂。余診其脈，尙未離經，痛在胃脘當臍，並不在少腹，而腰亦不痛。令衆人不必擾亂，且與洋烟吸三四筒，妊婦已醉，倦而酣睡，使人皆出房，聽其安眠，至明午始醒，而諸恙霍然矣。過二月舉一男，今已十一歲矣。故妊娠有病，斷不可雜藥亂投也。

滑胎

余在師處見一施姓婦，年未三旬，每受妊至三月，卽小產，已經三次。是年受妊近三月，恐其又滑，就診吾師。此婦面色晄白，而略兼青色，口淡不渴，飲食不能剋化，脈細濡而形寒。吾師進以附桂八味湯，服十餘劑，面色稍紅，飲食稍進。謂其夫曰：不必服藥，惟每日服附桂八味丸三錢，服至臨產，自然母子俱安。後果無恙。余問師曰：方書所載，胎前忌熱，產後忌涼，胎前忌泄，產後忌補，何以此婦胎前反多服熱藥。師曰：譬如瓜果結實，貴在天氣之溫和，人之養胎，亦貴陰陽調和，人之體熱火旺而滑胎者，如瓜果方結，曝日亢旱，雨露少滋，自然葉萎而果落，故宜用涼藥以潤之，使熱去而果自可保。寒體滑胎，如花後結果，陰雨日久，天氣寒涼，無陽和之氣，果亦不克長成，故服熱藥，使其陽氣舒發，陰寒去而果乃可保。若拘於成書治病，卽無從下手矣。況安胎本無成方，熱者清之，寒者溫之，氣血不足者固之，補之，氣

血有餘者，理之和之，所謂大匠誨人，能與人規矩，不能使人巧也。

產後咳痢

常熟大東門外萬興祥茶葉舖執事胡少田先生之妻，素未生育，至三十九歲始有娠。懷孕七月，始則咳嗽，繼則下痢，初則不以爲意，臨產頗難，產下未育，心中悵鬱，肝本乘脾，咳嗽下痢更甚。邀余診之，余曰：雖云新產，年近四旬，氣血本弱，況產前咳嗽，本屬土不生金，子反盜母氣，脾胃反虛，清氣下陷，轉而爲痢，咳痢已有三月，又兼新產，名曰重虛。若多服益母草等味，再破血傷陰，內經所謂損其不足，且有無虛虛、無盛盛之戒。余進以十全大補湯，去肉桂，加枸杞、菟絲、杜仲、飴糖等味。衆曰：產後忌補，斷斷不可。余曰：放心服之，如有差失，余任其咎。服後當夜咳痢均減。明日再進。其姑曰：產後補劑，勝於鴆毒，必致殞命。余謂少田曰：既令堂不信，君可另請婦科開方，暗中仍服補劑，免得多言，使產婦吃驚。同道董明剛曰：此計甚善。余卽回城，託明剛依計而行。余回寓，使人贈少田人參二枝，曰：不服人參，下焦之氣，不能固攝。少田卽煎人參與服。其母知之，執持不可，後將達生編與衆人閱看，產後並不忌補，其母始信。服後安然無恙。後再服數劑，咳痢均愈。此症若泥於產後忌補，或惑於人言，冷眼旁觀，以徇人情，免受人謗，將何以報少田之知己乎？然產後服人參敗事者，亦復不少。惟藥不論補瀉，貴乎中病，斯言盡

之矣。

產後中暑

昭文幕友張筱洲之妻，生產正在酷暑，新產兩朝，猝然神昏顛倒，言語錯亂。余診之，見喘息氣粗，脈洪數極大，汗出如珠，口渴煩躁。余曰：此乃熱中於裏，逼陰外出而大汗，仲景白虎症也。卽將蓆置地上，令產婦臥於地，用盆置井水於旁，使其安臥片時，神識漸清，氣亦漸平，脈亦稍靜。卽擬仲景白虎合竹皮、竹葉之意，進以石膏、竹茹、竹葉、知母、白薇、鮮石斛、益元散、綠豆衣、丹皮、花粉、青荷葉、西瓜翠衣、甘蔗汁、大隊甘寒之品。服後至晡，神清熱減。仍令其移臥於牀，進以稀粥，仍以甘涼之劑調理而愈。若拘於產後不可見風，不得服藥，此症豈能挽回。琴地風俗，新產之後，往往窗戶密閉，幃幙重遮，酷暑不異嚴寒。以致產婦汗多傷陰，而變爲鬱冒痙厥者，或竟有觸穢中熱而死者，不亦大可異哉。

產後氣脫

辛卯冬，余至五渠夏宅診脈，回至舟中。有陸二官，余之僕也，其妻追至舟中，云：家中姪媳病重，欲邀余診。余因有別事，不能逗留。陸二夫婦匆匆回家。余亦反棹，已去里許。余在舟中付之，看陸二夫婦驚惶

失色，必病勢危急，若袖手不救，於心何忍，即停舟步行至其家，見其家中聚集多人，病人勢已臨危。余即問其病情，因孀胎難產，去血過多，氣脫矣。余即診其脈，已絕，目瞪直視，牙關緊閉，用火刀撬之，舌縮色白，面色如紙，肢體俱冷。余即將艾葉灸其小足指外兩炷，稍能伸縮。余曰：未必竟死，此乃氣隨血脫也。若不急救，三四時氣必絕矣。用黃芪四兩，當歸二兩，炒棗仁三兩，煨牡蠣四兩，煨龍骨一兩，炙甘草三錢，炒淮麥三錢，紅棗三兩，炒白芍六錢，桂枝錢半，桂圓肉二兩，茯神二兩，黨參四兩。給其藥資一元。將大罐煎沸，以氣熏其鼻，頻頻灌之，再添水煎，再熏再灌，共服十餘碗，肢體漸漸轉熱，至四更始醒。此症若從市醫產後忌補，聊將生化湯塞責，必死無疑。余之親歷產後，每每當補宜速補，決不敢因循誤事，以致不救。

產後血脫

常熟塔前高姓婦，十一月二十九日生產，至十二月朔，下血甚多。請王姓醫治之，進以當歸、杏仁、冬瓜子等，又方加以肉桂。初五邀余診之，脈芤而無力，面色晄白，唇舌俱白，毫無華色，神氣疲乏已極，口唇掣動。余診之曰：此氣隨血脫，血虛則內風煽動，宜遵血脫先固氣之法，非大補不可。立方黨參一兩，黃芪一兩，枸杞一兩，當歸三錢，白芍二錢，桂枝五分，炙草六分，龍骨三錢，棗仁五錢，茯神三錢，紅棗十枚，

桂圓肉十粒。服後神氣略清，精神漸振。照方減半，又服二劑。惟小便自遺，大便不更，此係神氣不固，血液虧損，津液不能敷布大腸。又改方淡蓯蓉三錢，杜仲三錢，杞子五錢，潼沙苑三錢，白芍二錢，菟絲子三錢，蒲黃炒阿膠二錢，紅棗五枚，桂圓肉六枚。服後小便遺止，大便已通。後服和營理氣，調養肝腎而痊。俗云產後忌補，不可執一而論也。

產後血暈

常熟吳恒和茶鋪老太太云，其年輕時產後必要血暈，連生數胎皆然。諸方中惟蘇木煎汁，沖入陳酒，童便服之爲最妙。因已親試，故囑余誌之。

產後洩難

徐漢泉妻，新產後小洩澀少而艱難，邀數醫治之，俱罔效。後請江陰周姓醫，進以五苓加通草、瞿麥之類。服後小洩頻數而極少，一夜數十行，出如箭速，而子門如烙，熱痛非常，發熱口渴煩躁，病勢甚危。邀余診之。余曰：仲景云，產後小洩少者，無血也。若以淡滲苦泄，更傷其陰液，則小便更少，而熱更甚。急養其陰，自然洩長而虛陽亦潛。進復脈、增液合導赤湯法，生地一兩，麥冬五錢，元參四錢，阿膠三錢，天冬

二錢，石斛五錢，生草梢一錢，生牡蠣一兩，生龜版一兩，西洋參二錢，煎濃汁飲之。小溲頻數漸減，煩躁發熱漸安。服三劑，熱痛已平，小溲清長。後服甘涼鹹寒十餘劑而愈。所以產後溫邪熱病，傷陰劫液，以致水源竭涸，爲醫者又復用淡滲利水，何異操刀殺人乎。臨症時急宜留意焉。

血分

常熟旱北門吳姓女，十九歲，經停四月餘，飲食如常，脈亦不澀，肌肉不削，不內熱，不咳嗽。其父母恐停經而成乾血。余曰：飲食如常，肌肉不削，少腹脹硬，此乃水寒與血互相膠結於血室之中，若不趁其正氣旺時攻之，待至日久，正虛難以再攻，即以瞿麥、桃仁、紅花之類，罔效。再以歸尾、紅花、肉桂、山稜、莪朮、延胡、五靈、炮薑、桃仁等品，服百餘劑，不效。自六月至十月，少腹漸硬，諸藥不效。至十二月，余適回孟河度歲，請某姓婦科，服以四物等湯，恐其血虛，經不能濟，先養其血，少腹更硬。又延某醫治之，曰：被余某破血太甚，急宜補之。進以四君、補中益氣之類，少腹仍然。二月，余回琴，仍邀余診。少腹脹硬，令其母捫之，其冷如冰，痛不可言，肢冷面青。余曰：水與血互結血室，下之亦死，不下亦死。既是血虛，豈有服山稜、莪朮、歸尾、桃仁等百餘劑而不死者耶。余卽進桃核承氣湯，大黃四錢，桂枝一錢，炙草一錢，芒硝二錢，桃仁三錢，陳酒和水煎，分三次服。初次服下，小便中卽下黃膩水，連服三次，連下三次，腹痛稍緩，神氣

極疲，少腹稍軟。明晨，余恐其過下氣脫，即進以活血理氣之品，血仍不下，腹痛更甚。再進以桃仁承氣湯，送下抵當丸，不料腹痛欲厥，即以艾葉煎湯，洗熨少腹，下黃膩水更多，又下紫血塊數枚，而痛即止。兩月後，信水如常，至九月出閣，強健如昔。余讀金匱仲聖有瘀血在少腹，或水與血結於血室，大黃甘遂湯、下瘀血湯、抵當湯，皆非大黃不可，因大黃是血分之下藥也。此症若不遵古訓而不用大黃，雖山稜、我朮千劑，亦徒然耳。所以仲景之書不可不讀也。

黃帶

常熟東鄉某姓婦，就寓診云：帶下黃膩水，終日淋漓甚多，且臭穢不可近。診後椅墊皆濕，腥臭不堪。余思五臟五帶，黃帶屬脾經濕熱，清氣下陷，不能固攝。然病已半年，亦難速效，姑擬補中益氣法，原方去當歸，加菟絲、龍骨、牡蠣，使其清氣上升，脾有約束，以菟絲、龍骨、牡蠣堵截其下焦，亦杜撰不經之見。不料服三劑，病已霍然。余亦不解其妙。

陰癢

余在業師費蘭泉先生處，見師治一嫗，年約五十餘，陰癢半載，服黑歸脾湯大劑三十餘劑而愈。余不

甚解，問之。師曰：治病所謂世傳者，皆有祖父之遺法也。道光時吾族中某太太，年近六旬，陰癢數月。此時吾孟醫道正盛，每以利濕清熱之劑，或以炙肝片夾之。其癢更甚，徹夜不寐。後延孟河北鄉賈先生，即以黨參四兩，桂圓肉四兩，煎濃汁，分申戌子三次服盡，即能酣寐。至明日日晡時始醒，其病霍然。衆問故。賈先生曰：高年血燥生風，諸公用利濕之品，利去一分濕，即傷其一分陰，濕愈利而血愈虛，血愈虛而風愈甚，其癢豈能止息。治法無奇，惟養血而已。衆皆佩服。吾今日之用歸脾者，亦東施之效顰耳。余後遇高年二人陰癢，亦宗歸脾湯治之，無不應驗。故誌之以爲世用，不敢負吾師之苦心耳。

小兒初生撮口

小兒初生，或三四日，或一二日，牙齦忽硬，不能吮乳，是謂撮口。余大兒渭川初生三日，即牙齦僵硬，不能吮乳，以針刺牙齦上下數十針，用棉拭其血，稍能吮乳。明日牙齦仍硬，連刺四五日，出血甚多。初生小兒，受此痛楚，爲父母者皆不忍。余故留心此症，後得一法，果有效驗。次男渭耕初生亦然。即看小兒之兩乳內，皆有硬塊，如小薺大，可先將小兒之乳吮之，後即輕輕擠其乳，果有白色如米漿之乳汁并出，一日夜擠五六次，乳汁擠盡，牙齦腫硬亦平，即無患矣。余親閱歷之事，故誌之以保嬰兒也。

骨槽風

一婦三十餘歲，氣血素虛，痰飲喘咳時發，始以肝氣入絡，流走肢體，或痛或愈，後有氣從左脇上竄頰車，引及項側額角，抽掣極痛，按之焮熱微腫，始皆疑體虛外風引及內風竄絡，骨槽風之見症也。初服清解祛風化痰，胸中痰飲氣逆咳喘俱甚。進以二陳、苓桂、朮甘、乾薑、五味等服之，喘咳已平，胸膈舒暢，而頰頤作痛更甚，纏綿日久。余曰：肝爲風臟，膽爲相火，少陽之脈絡，爲水火升降之道路，陰分虛則肝熱，虛風上擾，故升之則痛，降則痛止。肝血少，木失涵養，木旺尅土，脾失運化，飲食積蓄，爲停痰積飲。若顧此失彼，非其治也。當柔肝抑木，養榮健脾，治風先治血，血行風自熄之意，用人參、當歸、蒺藜、潼沙苑、製首烏、阿膠、煨牡蠣、棗仁、白芍、廣皮、半夏、茯神、炙僵蠶、炙草、烏梅之類，服五十劑而愈。

吾同道某，始起吐瀉，服理中湯而止。惟舌絳遍體氣竄攻痛，背脊兩旁痛更甚，抽掣項後作強，正在太陽之脈，服桂枝法無效。後竄至脇，舌絳口糜，服祛風平肝，養血通絡，少效。後竄入牙齦頰車，項側極痛，牙關拘掣不利，燥而不煩，精神疲倦，症頗危險。卽服人參、歸身、萸肉、白芍、龜版、熟地、阿膠、麥冬、石斛、女貞等滋陰之品，漸漸痛止。余語之曰：醫無成法，此等症醫書皆未經見，若作骨槽風治之，危矣。

癰癧

琴川東鄉周姓農婦，早寡無嗣。有田而四畝，夫兄爭之不休，憂鬱而脇腕作痛，項頸兩旁起核堅硬，就診於余。余曰：憂愁則氣閉不行，思慮則氣結，忿怒則肝火上犯，久則生失榮馬刀，難治之症也。幸經水仍來，雖少未絕，猶可挽回。余勸其將田而讓於夫兄，紡織亦可度日。惟貧病相連，無資服藥。余勸其無事行坐念佛，可解愁緒，而絕忿爭之念，使肝氣條達，虛火不升，而可苟延歲月。以鮮芋芳切片曬乾二斤，川貝母二兩，薑半夏三兩，共爲細末，用淡海藻二兩，昆布三兩，煎汁泛丸，臨臥用雪羹湯淡海蜃三錢，大荸薺五錢，煎汁送下三錢，再用歸脾湯原方倍木香加柴胡、白芍，三天服一劑。經三月餘，項塊漸消而軟，脇痛已止，信水依時，諸恙霍然。若不勸其讓產念佛，終日擾攘不休，未必不死於鬱症也。

橫涇有王姓婦，因其夫私有外遇，不顧家事，有兒女各一，男六歲，女三歲，夫妻反目，吵擾不休，氣鬱日久，左項堅硬，嘔吐腹痛，經阻三月，醫皆疑爲妊。就余診之，按脈堅硬而澀，面色青黯無華，斷無妊娠之理。彼細述家事。余曰：氣血久鬱，防延變內熱咳嗽，則難治矣。問其夫偕來否。曰：在寺前買物，使之先來，稍停卽至也。其夫來寓。余曰：症由鬱怒傷肝，非妊娠，乾血勞，難治矣。察其夫面色略變，有徬徨之狀，尙有不忍之心。余曰：若能依我三事，尙可挽回，若不能依，延他醫治之。其夫問故。余曰：一要三月不出外，

在家代其勞。二要順其性，倘有加怒，不可違拗。三要股勤服侍湯藥，調理飲食寒暖。如能依此，一方可痊。其夫一一遵之。早服歸脾丸三錢，晚服逍遙丸三錢，再用歸芍六君湯加二陳、香附、柴胡，一月服十劑，用海蜇、紫菜等作羹食。調理三月餘，項間腫硬已消，月事以時下，夫妻反好如初。後偕至余寓，擬一膏方。余見之欣喜。若七情鬱症，不順其性，十難愈一二耳。

常熟某，素性誠實儉樸，完姻數載，起馬刀失榮，從耳後項左側脹硬如臂，潰破膿水淋漓，咳嗽吐血，便溏，大肉皆削，皆謂不治。余曰：白髮在堂，襁褓在抱，若棄而不治，於心何安。然貧病相連，豈不能服藥，係真人謂一不治也。有其內姊丈某解囊助藥資，余璧診金，盡心調理。服甘溫調脾，大便堅硬，咳甚痰多。即用甘涼清潤，金土同調，咳減，便仍溏。更番金土而治。如斯者三月，脾胃漸旺，大便稍堅，納增咳減。後以歸脾法加疏通氣血之品，再以和榮散堅丸兼服。臥牀載餘，項頸潰爛亦斂，堅硬全消，起復如故。倘醫知難而退，親戚不肯解囊，亦不治之症。所以爲醫當盡心，爲親戚當盡力，絕症亦可勉力挽回。

時毒

常熟塔後孫姓嫗，年六十餘歲，始因寒熱，子媳不暇問及，至六七日頭腫如斗，色紅，滿面水泡，大者如栗，小者如豆，兩目合縫，舌黑神昏，撮空囁語，瘡厥，皆欲以承氣等下之。余曰：熱邪溫毒，先犯上焦，熱熏

膈中，如烟如霧，無質之邪，蒙蔽包絡，苦寒直達，攻其腸胃，不能及上焦膈中之病，反使高年氣弱，邪乘虛下陷，危矣。先將細磁碎塊擇鋒利者，夾在筋頭上紮好，將面上泡砭盡，用棉拭乾，滋水，將芙蓉葉、青黛、大青葉、人中黃研末，鮮菊葉搗汁調敷，乾則以菊葉汁潤之。先研至寶丹一粒，井水調服，再以犀角、羚羊角、赤芍、連翹、人中黃、梔皮、竹葉、石膏、紫草、忍冬花露等輕清之劑服之。一周時腫勢全消，熱去神清。再服白虎加人參湯、竹葉石膏湯數劑而愈。

時毒、風痰、乍腮、蝦蟆脹、大頭瘟等症，大江之南，春夏間最多。治亦不知凡幾，絕無不救者。惟癸巳冬見一異症。是冬無雨雪，亢旱而熱，某宦上唇忽起一瘰，某醫作疔治，用刀挑破，插以藥條，痂結而愈。忽頭面漫腫，羣醫畢集，有云大頭瘟，有云遊風毒，有云疔走黃，有云面遊風，各執一見。病家疑惑不決，不敢服藥。延數日，胃氣日憊，烟穀不進。後又一醫曰：此疔毒竄於絡中，非大寒退熱不可，進以犀角、羚羊、金汁、玳瑁等品。另服梅花點舌丹四丸。有友與余言及此症。余素不諳外症，曰：無論大頭瘟、疔毒、時毒、溫毒，其病源則一也，不過以輕重之間分之耳。然人元氣有虛實，體質有寒熱，膏粱之體必虛，嗜烟之體必寒，梅花點舌丹香竄必耗散真元，寒藥過度，必損胃陽，熱雖退，正氣必不支矣。服藥後頭面腫漸退，元氣日敗，毒陷不起，兩目出膿，耳鼻皆流血水，口吐血痰而斃。余思此症不知作何治法，留質高明。倘遇此症，立定治法，庶不致病者太慘耳。是冬疫痘盛行，種過牛痘者，皆出天花，服寒涼債事者極多。吾

同鄉方孝廉令郎二人，一十九歲，一十八歲，余俱以溫補養元，托漿和脾胃，上漿結痂皆順。雖云痘症當先去毒，余思年長及衰老出痘，非虛不能受此瘟邪，又兼深冬陽氣潛藏，天寒秘蟄，非溫補內托不可。若在春令陽氣浮越之時，小兒體質強壯，有實熱者，寒涼亦必需也。見病治病，隨症立方，是爲真的。專信陳言，拘執寒涼，偏於溫補，卽非上工。

齒 衄

常熟寺前毘陵人木梳店俞姓，年二十餘歲，齒衄如注，血流盈碗，面紅目赤，脈來虛浮兼數，重按無力，神靜不煩，口不臭穢，言語輕微。余曰：此乃少陰龍火上燄，齒熱則齦肉離脫，齒縫血出不止，手足清冷。急用肉桂五分，研末飯丸，先空心服下，食以糜粥，使其壓之下焦，再進甘涼鹹寒滋降，導龍入海，再將生附子、麝香作餅，貼左足心湧泉穴。一劑血止，兩劑手足轉溫，脈漸斂，和平如常矣。

舌 瘍

常熟東門老塔前盧姓太太，是晚至寓就診，脈來浮數，滿口出血盈碗，彼自謂出自齒縫。余燈下觀之，血凝滿口，不能清切，以齒衄治之，投以玉女煎，陽明少陰合治。明日出血更甚，邀余就診其家。脈仍浮

數滿口血糜模糊，吐血滿盆。余令其用涼水漱口，將血拭淨，細看其齒齦不脹，並無血出，見其舌上有血衣一層，用箸撥開，舌衄如注，舌上小孔無數，皆如針頭。余曰：此乃心脾鬱熱，迫血妄行，舌衄也。急用蒲黃、槐花炭研末敷之，進犀角地黃湯加蒲黃炭、中白、青鹽鹹寒滋降等品，合四生飲一劑而愈。所以診病苟不細心，仍作齒衄治之，不效血出過多，難免危險。

常熟沖天廟貢某，先因濕溫，漫熱不寒，脈來滯澀，胸脘痞阻，洩赤作嘔。邀余診之，以溫膽湯加入淡滲苦泄之品，不能速效。病家又延某，即病家之至友也。病者商於醫曰：若能下去宿垢，腹中痞阻可鬆。某徇病人之請，即於方中加涼膈散數錢及瓜蒌仁、元明粉等下之，皆稀糞。明日漫熱不止，腹中仍痞阻不舒，某因下之不效，代延其師診之，仍用瓜蒌、芒硝、枳實等下之，不效。後兩頷作脹，舌澀言語不清，停二三日，湯飲不能下矣。舉家驚惶。其兄某來寓，商之於余，再往診之。已有瘍科某診過，方案中有云：舌卷囊縮，鞭長不及馬腹，不治之症矣。余脫病人袴，視其腎囊，縱而不收，並不縮，燃燈細視其舌，腫而且厚，雖短不痛，以指捫之，強硬無津，所以飲不能入，語不能出也。或曰：腎津告涸，非人參、五味不能救，或云：非生地、阿膠不能滋。余曰：此症非津竭也。如津竭舌縮，其舌當痛，皮皺色紫，頷下不脹。余捫其舌強硬而厚，此乃熱陷心脾，重舌、舌疔之類也。內經云：重舌，刺舌柱以披鍼也。外科金鑑曰：重舌等將鍼刺其舌，血色紅者生，色黑死。非鍼刺不可。阿膠、生地、人參、五味，有虛實霄壤之殊。他人皆云好刺更妙，非

君不可。余曰：事急矣。余雖非外科，且從權耳。將鍼一枚，用竹箸一隻劈開夾在其中，用線紮緊，露鋒二三分，按舌刺之，共七八處，以紙拭之，血色尚紅。後再刺之，見舌上有白泡，以指掠出看之，膿也。再盡力按之，膿漸潰出。進清熱消腫之方，當夜喉間漸鬆，漸能進飲，數日漸消，能進稀糜。後手臂伏兔等處起流痰數塊。余曰：卽請瘍科治之。瘍科治月餘，皆曰膿尚未成。有江陰戚彥卿先生來常熟，薦其診之，曰：膿皆成熟，若不開泄，傷筋爛骨矣。彥卿一一開之，進以補托，數月而痊。所以內外兼症，內外科各相推諉，延宕時日，鮮有不誤事者也。

咽喉

常熟南門鴻源衣莊查姓女，九歲，素體柔弱，忽起喉風，痰如拽鋸，聲啞言不能出，目眶微陷，幸面色不青。他醫治之，已有兩日。邀余診之，余曰：如急喉風，不過二三時，多者一日而已。既有兩日，雖屬危險，不致傷命，因其肺中未曾阻塞，尚有呼吸可通。急將開關散吹鼻數次，猶能得嚏二次，噴嚏之後，呼吸漸靈。再將白蘿蔔四兩，鮮梨四兩，鮮荸薺三兩，鮮薑一錢，搗汁，竹瀝五錢，和入風化硝一錢，頻頻呷之。用牛蒡、桔梗、甘草、人中黃、馬勃、翹、梔、元參、蘆根、竹瀝、川貝等服之，時時用燈心捎鼻管，使其噴嚏，吹以硃黃、人中白、風化硝等開泄化痰藥。如此兩日，痰聲漸平，眼淚漸出，三日微聞其音，後以清宣肺氣，養陰

滋降，三四日痊。此乃喉風之輕者也。

余在師處見治一施姓小兒，喉中聲如拽鋸，音啞，涕淚皆無，吾師曰：馬脾風症也。鼻孔煽動不息，以麻黃、芥子、黑白牽牛、大黃、杏仁、石膏等下之而痊。太平洲藜藿農家之子則可，若吳中柔脆之孩，醫雖能用，病家必不肯服，卽病家肯服，醫家亦不肯書也。所以吳中喉症不治者多，臨證最難，若以此法使之輕病弱體，不堪設想矣。古人云：藥必中病，一言盡之矣。如百步穿楊，九十九步不及，百零一步太過矣。吾輩治病，若云藥能中病，恐天下爲醫者，不敢言也。

喉症之始，苦寒之劑當慎。喉症在急，刀鍼不可不用。余同鄉某宦使女喉痛，瘍醫進以苦寒直降，寒熱猝止，喉腫秘塞不通。又以土牛膝汁等灌之，更不能入。飲不能入，言不能出，喉中痰鳴，已一日夜。是日邀余診之，細視喉四圍脹腫，無隙可通，呼吸將絕，與其飲，搖手而已。問其語，點首而已。藥不得入，無法可施。余卽將喉鎗露鋒一分半許，刺其兩旁腫處十餘刺，出其毒血。再用棉條，以篴兩只將棉條頭夾住捲緊篴上，用冷水濕軟，拭去惡血。再將篴連濕棉條捲緊，探其喉作嘔，吐出膠痰半碗。再刺再探吐，共刺三十餘刀，探吐三次，共嘔吐血痰一碗，以涼水漱口，滌去血，飲以淡鹽湯卽可下。言語亦可出，腫亦漸消。此乃腫秘痰塞，若不動刀鍼探吐血痰，挨延半日，呼吸不通，痰涎湧塞，豈有生理。喉科刀針斷不可缺，專恃湯藥，點滴不入，無所用耳。

某宦女，素係寒體，中陽不足，便溏氣弱，因染疫寒熱，咽微痛。余進以辛涼微溫開解法，覺發熱略重，喉脹較甚。卽更瘍科，進以羚羊、山豆根、金鎖匙、芩、梔等苦寒清熱，寒熱卽止，脈細，紅痧隱於皮膚之裏，舌膩不渴，神煩昏憤，咽痛極甚，目珠上視，或目珠轉旋，手足抽攣，背脊角弓反張，言語不出，已成瘰厥之險。邀余診之，卽以至寶丹研細，以化痰開肺之品，合竹瀝、薑汁調勻灌之，瘰止厥平。後以化痰宣肺和緩緩緩治之，七八口喉中吐膿血而痛緩。始終二十餘日，未能見一寒熱，紅疹隱隱，未得透發，此早服寒藥失表之症。後傳染數人，余急先開表，辛涼外解，使其得汗，用喉刀刺其脹處出血，三四日得汗後，痧透熱止，咽痛亦平，未有遭如此危險者。所以瘟毒溫邪之始，苦寒當慎，恐熱遏不透，變厥症也。

余同鄉某，假館廣東，至京都朝考。廣東嵐瘴濕熱，疫毒重蒸，又兼輪船煤氣熏灼，飲食皆需煤火，熱鬱咽喉腫痛，京中之醫，治以玉女煎重劑，一服而平。朝考畢回南，咽喉又痛，兩旁作腫。余以輕揚解散普濟消毒飲加減之，覺發熱較甚，喉痛亦增。病人云素體陰虧，切不可服發散。因京中服玉女煎一劑而平，若不服生地、石膏等，斷不得愈。余一時眩惑，徇病人之情，亦投以玉女煎，去牛膝加甘涼之品。自此寒熱止，舌膩，痧疹隱隱不出，脈變滯，晨清晡甚，至夜囁語，煩躁不寐，咽喉更痛，雙蛾作脹，溫邪蒙蔽，有作瘰之勢。余曰：先誤於京醫之玉女煎，退熱於裏，再誤於余之玉女煎，更秘其熱，濕邪上泛，病變濕溫。一徇病人之情，卽遭此危險。治病其權在醫，不可徇情，致生疑惑。卽進二陳、溫膽法，加枳、朴、藿香、苦溫。

芳香，三四劑，亦無大效。再將喉刀刺出毒血，將前方加以苦溫化濕，淡以泄熱，藥內沖生薑汁半酒杯，服後喉痛即止。後服燥濕泄熱十餘劑而愈。用藥一誤，挽回如此費力，用藥可不慎哉。

發背

孟河巢姓，巨富也。疽發背，大如覆盤，長尺餘，闊七八寸，延沙達周先生治其外，延費士源先生治其內，士源，吾師之祖也。時正酷暑，瘍症已潰，治之匝月，去腐生肌，頗爲順手，瘡沿漸平，尙有尺餘嫩紅肉如珊瑚樣。費先生所投之劑，皆和胃利濕清暑，極平淡之方。沙先生謂士源曰：君主治內，巢某年近耳順，氣血已虛，當服補藥。何以數十劑皆係清熱利濕之品，肌肉安能生乎？費笑曰：君雖瘍科名手，內科尙欠功候。患者早食蓮子、紅棗一碗，午食海參、煨肉一碗，胃氣如此，其生肌長肉之功，勝於補劑多矣。況方書所載，膏粱厚味過度，濕熱痰滯，壅阻聚熱而成癰疽，內經云：膏粱之變，足生大疔是也。又兼時正長夏，暑熱濕三氣熏蒸，每日爲之利濕清熱，尙恐不及，若再服溫補，聚濕聚熱，必致胃呆氣滯，熱閉神昏，瘡肉泛紫塌陷，功敗垂成矣。沙先生深佩服之。共服藥百餘劑，未服一劑溫補而痊。孟河沙達周先生，瘍科名重一時，尙未講究內科，幾致誤治。幸費先生執定主見，始克成功。所以習外科者，不可不習內科也。

流痰

孟河巢沛三先生，治一橫橋開肉鋪者，身上流痰十餘塊，久潰不愈，色紫黑而肉僵硬，不知痛癢，無膿流水，肌肉皆削，胃氣索然。患者曰：我戒口多時，胃氣憊敗，不知能稍食葷腥否。沛三先生曰：思食胃氣尙旺，肉鴨亦可食之。患者曰：若能開葷，死亦瞑目。看其病情，係多服寒涼，氣血凝結所致。投以金匱腎氣湯，月餘，肌肉轉紅，漸軟作癢。至兩月後，先生再至橫橋，有一人體肥貌豐，叩謝先生茫然，幾不識其人，問其原委，從開葷之後，胃日健旺，一方服六十餘劑，瘡平肌復矣。所以外症以胃氣爲本，胃以食所喜爲補，若各物禁之，再以寒涼剋伐脾胃，或溫補壅塞助火，則殆矣。孟子云：盡信書，則不如無書。臨證變通，方爲上工。

壬午後余至琴川，有張姓，身上數十孔，大如錢，色黯肉僵，流水無腥穢味，不知痛癢，肌肉削瘦，人皆謂楊梅瘡。余曰：寒涼凝結。出前醫之方，俱苦參、黃柏、木通、翹、梔、芩、連、土茯苓等類。因戒口極淨，胃氣呆鈍。余令其開葷，從先生金匱腎氣法。十餘劑後，服溫通氣血之品二十餘劑而痊。後遇類此者數症，莫不應手，皆食先生之德，故記於此，聊志感仰之意。

脇癰

壬午，余治琴川興福賣糕糰者脇骨生癰。瘍科謂外肺癰，開刀出毒，四十餘日瘡口不斂，時流稀膿，家窘，聽其不治。余診之，脈來虛弦兼數，噎咳白痰，咳則稀膿流出，漸成瘡勞。幸裏膜未穿，與蠟礬丸先護裏膜，進以金匱旋覆花、千金葦莖湯，旋覆、新絳、枇杷葉、生冬西瓜子、薏米、淮山藥、石斛、生扁豆、茯苓、川貝、鮮荷梗、橘葉、鮮百合、毛燕之類，肺胃並治。服三十劑，咳減納增，膿出漸少而厚。先以提膿末藥提之，再以生肌等藥填之，兩月餘而愈。所以緩治平淡，久則自然有功。再服毛燕月餘，咳止，瘡口平復。如此症或醫藥寒涼溫補亂投，或病家性急不信服藥，每棄而不治者多矣。

肺痿

常熟西弄徐姓，金陵人，年五十餘，因子不肖，動怒兼鬱，咳嗽吐痰。延某醫治之，進以木香、厚朴、豆豉、牛蒡等，咳更甚，面紅，痰沫頻吐，起坐不安。前醫見其面紅煩燥，進以鮮生地、鮮石斛、梔、翹、芩、連等，更甚。吾友仲鳴徐君，偕余往診之。脈虛大無力，煩燥面赤，舌白底絳，頻頻吐痰，滿地白膩如米飲，雖臭不甚。余曰：燥傷肺金，再進苦寒，中陽阻遏不通，肺無肅化之權，清陽不能上升，津液不能上承於肺，肺之蓄水

不能下行，愈吐愈乾，肺將痿矣。即用千金炙甘草湯原方，取薑、桂之辛散，開中宮阻隔之陽，引酸鹹柔潤之藥下行，化津液救上之燥，取參、草、棗培土壯氣，使土氣可以生金，麥冬、麻仁潤肺而柔陽明燥金，加薏仁泄上蓄之水下行，肺氣清肅下降，津液方能上承。此方爲千金治肺痿屢效之方，故補入金匱。後人用此方每去薑、桂，畏其辛熱也。不知大雨雪之前，必先微溫，一派柔膩陰藥，賴辛甘之味可以通陽，藉其蒸化之權，下焦津液上騰，肺之清氣自可下降，雲蒸雨施，始有效耳。照方服兩帖，痰沫已盡，咳嗽亦止。後服甘涼清潤，生黃芪、北沙參、百合、玉竹、川貝、枇杷膏、甘草，壯氣潤肺清熱，十餘劑而痊。今已五六年，強健逾昔。占人之方，不欺後學。人言將古方治今病，如拆舊屋造新房，使後人擬古酌今，非使後學不用古方也。

肺癰

常熟鼎山高渭榮，春初咳嗽，至仲春痰中帶血，味兼腥穢。延他醫治之，進牛蒡、豆豉、枳殼、厚朴等，服後逾甚。邀余診脈，細數無力，咳嗽痰血味臭，曰：肺癰將成。胸有隱痛，絡瘀尚未化膿，尚有壅塞，肺葉所壞無幾，急速開提，使膿外出，不致再潰他葉，擬桔梗甘草湯、金匱旋覆花湯合千金葶藶湯。因其膿成無熱，用蘆頭管乾者一兩，煎湯代水。服三劑，每日吐血膿臭痰一茶盞，至四日膿盡而吐鮮血，臭味亦減，

未盡。將前劑去桃仁、桔梗，加枇杷葉、綠豆皮等，服五六劑，血盡。再進以金匱麥門冬湯、千金甘草湯等，加沙參、石斛、百合等清肺養胃而愈。再以甘涼培土生金，調理一月，強健如故。

後有常熟白龍港某，與高渭榮爲友，二人酒肆中回，同日咳嗽，亦生肺癰，至高渭榮病愈往探之，卽邀余診之。脈已伏，膿血臭甚，傾吐滿地，裸體臥牀，用扇扇之，口中聞要吃西瓜飲冷水。他人摸之，體若寒冰。衆人詢問何如。余曰：肺已爛盡，一身之陽氣，俱從外泄，危在頃刻，慮扁再生，亦無治法。至夜而歿。仲景諄諄告誡，成膿不救，使人早治。然將成未成時，不治必死，治不得法，亦多死。

某寺和尚，冬溫咳嗽，每日飲橄欖、蘆根湯，數十日，咳嗆日久，痰臭不出。就診於余。脈右寸關數大而硬，時有鼓指。余曰：喉中痰少而臭，脈見右大鼓指，肺癰已經成膿，急宜開提，使膿傾出，免潰他葉，以甘草桔梗、千金葦莖法服。後吐出臭膩黃色膿痰碗餘。因其膿出太多，氣短納少。余曰：久咳膿多，肺葉敗壞，欲痿之勢，進炙甘草湯。他醫見之曰：此是酒勞，被其誤治，先服桃仁，後服薑、桂，皆非治法。不知古人立方，有奇偶佐使。後延他醫治之，遷延月餘，吐膿不止而歿。

常熟東門某姓，年將周甲，素嗜飲，痰飲咳嗽有年，余每以橘半六君、桂苓朮甘等服之，皆效。是年咳嗽又發，有親戚某略知醫學，頗爲關切，與服牛蒡、豆豉、枳、朴等六七劑，咳吐白痰不休，漸漸神昏目瞑，語拈衣摸牀，舌薄白不渴飲。是晚邀余診脈，虛緩無力，痰如米粥盈碗。余曰：此肺液也，吐多則成肺痿。

喻嘉言先生曰：肺痿見其舌白，恣膽用燥藥，令其燔燔自焚而死者，醫罪加等。卽與千金炙甘草湯。服兩劑，痰漸少，稍能言語進穀，神識亦清。後其親至，因舌白不渴，膩藥難進，投以芳香甘溫，砂仁、棗仁、木香之類，兩帖而逝。生死雖曰天命，豈非人事甚哉！醫道之難。我等既以是爲業，爲謀衣食計，無所推諉，遇一病必細心推敲，用藥亦再三斟酌，尙恐不能取效。況稍涉獵醫書，得其粗而遺其精，知其常而昧其變，未嘗深思研究，閱歷有得，病變百出，何從措手。雖云親朋關切，豈堪輕試？語云：學醫廢人，能勿懼耶？徐靈胎先生醫論中言之甚詳，余不贅。

長田岸有孩六歲，正喫飯，被母打一下，大哭，飯正滿口，有飯粒噎入肺竅中，後卽咳嗽，無寒熱，飲食二便如常。就余診，服肅肺清散之品五六劑，見有寒熱，飲食漸減。又停半月來診，見痰中血絲，色殷而少，胸中隱痛，服葦莖湯合疏開氣法，罔效。細詢其病之始末，其母曰：喫飯大哭，噎咳而起，咳嗽月餘，見血後口中臭穢。余細視血中有白點微黃，膿也。余思食物噎入肺管，壅塞爲癰，將燈心刺鼻孔使其噴嚏，吹以皂角末。後得嚏，痰血稍多，再將旱烟噴之，使其咳更甚，咳甚大哭作嘔，嘔血塊兩枚，如蠶豆大，兼膿痰。余將血塊拈起剔開，中有白色朽腐如飯米形，服以葦莖湯合金匱旋覆花意，另服皂莢丸，一日一粒。服藥三劑，丸三粒，膿血清楚。再服麥門冬湯加枇杷葉、沙參、石斛之類而愈。故人飲食之間，不可多言喜笑，倘有物噎入肺管成癰，醫不能知，自亦不知，釀成大患，可不慎歟。此孩幸是藜藿農家，聽醫

所爲，若紳宦之家，嬌養柔嫩，卽醫肯盡心施治，病家未必信，卽病家信，醫家亦未必肯獨任勞怨，治病之弊如此。故治病誤於醫者固多，病家自誤者亦不少。余治肺癰，以宗金匱法爲最多，芳香金石之品，從來未敢輕試。

痞積

甘露鎮華姓，年五十餘，脘中痞硬，中脘穴高突，按之堅硬不痛。余曰：此氣阻積滯壅塞，急宜化滯理氣，用枳、朴、檳榔、麥芽、神麴、木香、桔萸、砂仁、青皮之類。服兩劑，下燥糞甚多，脘中平軟如故。後服參苓白朮散十餘劑，胃甦而愈。

李儀藩常熟毛家橋人，胃脘中堅硬如盤，約有六七寸，他醫皆謂胃脘癰，治之罔效，就余診之。脈來堅澀，飲食二便行動如常。余曰：飲食二便如常，中宮無病，此非胃脘癰也，痞積症也。寒氣夾痰阻於皮裏膜外，營衛凝澀不通，沉痼體陽虛，陰氣凝結少陽，氣失運化，非溫補不可。進附、桂、鹿角、枸杞、杜仲、巴戟、茴香、當歸、仙靈脾、參朮、木香、薑、棗等，溫補通氣活血，外用附子、肉桂、阿魏、丁香、細辛、山稜、莢蒺、水紅花、麝香、鹿角粉、木香、麻黃等品研末，攤厚膏藥貼之。服藥五十餘劑，貼膏藥兩月餘，而硬塊消盡，軟復如舊。

胃癰

福山塘謝姓，年逾知命，不咳嗽，吐膿血，不甚臭。余曰：此胃癰也。成膿之後，速達於下，用千金葦莖法，去葦莖，加瓜蒌、丹皮、酒製大黃、甘草。服後大便下膿血甚多。後進冬瓜仁、薏仁、丹皮、甘草、白朮、橘白、生扁豆、石斛、竹葉等。待膿盡，服扶胃清熱十餘劑而愈。

邵鏡泉浙江寧波人，年五十餘，在常熟設肆。壬午，因遍體絡脈抽痛，余爲愈之。二三年終日坐一小樓，飽食喜臥，日久胃脘阻硬不舒，延某姓醫治之，云濕熱，診十餘次，罔效。又延當時盛名之醫治之，曰：食滯濕熱，立方服二十餘劑，中脘高突。往蘇省就馬培之先生診之，曰：胃脘癰也。當留蘇十餘日，服藥十餘劑，待膿成熟，穿針泄毒，可不穿膜腐腸。邵服藥兩帖，少效，旋常熟，五六日亦不服藥，聽其脘中高突。吾友松筠張君曰：既上年遍身絡痛，是某治愈，何不邀診。余診其脈，來疾去遲，關寸見數，胃脘按之甚軟，高突如覆杯。余曰：胃脘癰也。內膿已成，卽向蘇就馬君處，或刀或針刺穿，待其毒泄，免穿裏膜腐腸。胃若遲則膜穿胃腐不救也。病者以余言太甚，怒色曰：胃若成膿，何以飲食二便如常，口中及大便何以不出膿血。余曰：臟腑不和，瘡發於外，營衛稽留，經脈血泣熱勝，恐肉腐膿向內潰，腐爛腸胃，若不早開外泄，必貽後悔。病者曰：臟腑未壞，先戳穿肚皮，不敢將命試馬君之藝。君勿言之。余曰：忠言逆耳，良

藥苦口。敬謝不敏。後邀某外科治之無效，經四十餘日，回寧波延醫治之，不識何症，到寧波府城中請著名外科視之，曰：胃脘癰膿成，二百金包治，病者亦願。不料已經內潰，出頭三處，出膿數碗，漸漸胃敗而歿。嗚呼！醫學難全者，卽此也。內科不能刀針，尙可飾說，有號稱有名外科，一見內癰，刀針手法毫無把握，聊將膏藥敷藥敷衍，釀癰成患，往往腐腸穿膜而斃，較內科方藥誤人何如耶？惟願後賢於開內癰之法，能潛心考覈耳。學內科者，內癰刀針不能不學。若逢內癰，內外科各相推諉，遺誤尙堪問乎。

肝癰

余治脇癰肋癰等症甚多，皆肝之外候也。內消理氣消瘀，蟲蟻搜絡，俱可取效。惟肝之本臟生癰，未曾遇見。憶昔在業師處，施姓婦素有肝氣，喪夫後因立嗣爭產不能決，後脇肋刺痛，經吾師治愈。經阻三月不通，覺左肋內由臍旁引痛腰脊，肌肉不變，重按之內覺極痛。吾師曰：此肝癰也。用延胡、柴胡、川棟、青皮、歸尾、木香、合桃核承氣法下之。下紫血片如雞肝。一劑後痛大減，再進消瘀理氣疏肝解鬱數十劑，經通痛止而愈。吾師曰：若肝經絡脈生癰，當用理氣活血之輕藥，取其輕可入絡。若癰生於本臟，當用破血理氣之重藥，取藥重力專，直攻本臟也。肝爲藏血之臟，血壅氣阻，葉脹成癰，故速下之，使肝中氣血疏通，腫亦可消。治內癰雖屬理氣消瘀，同一治法，然各臟引經之藥，必須用之。倘不用引經之藥，

反傷他臟氣血矣。

丁亥六月，余治常熟大河鎮某姓婦，早寡，上有老姑七十一歲，兩代孀居，攜子耕讀安居，不料有某暗侵其產，事至成訟，幸邑尊剖斷如神，產業保全。結案後，左脇肋及少腹臍旁作痛，大便秘結，小溲不通。他醫進以五苓、八正、導赤等滲利之品，罔效。就診余寓，問病之始末。余曰：肝絡繫於二陰，肝主疏泄，少腹刺痛，是鬱怒傷肝，恐生肝癰，急宜疏肝達下。用川鬱金、金鈴皮、香附、延胡、柴胡、木香、橘葉、歸鬚、瓜蒌、厚朴、合道遙散等一劑，另服通關丸三錢。大便已通，小溲亦暢。後原方增減服兩劑，痛漸愈。因姑有疾，即開船回家。余思此症日久必成肝癰，幸爭訟得直，屈有所伸，怒有所泄，肝氣尚可展舒，未致釀成大患，否則其害尙堪問乎。

腸癰

余臨症五年，遇腸癰數人，始萌未成膿者，或理氣消瘀溫通，服藥而消者，茫不記憶。有一人未能成功，自愧醫學不精，刀針手法，缺少師承，聽其內潰而死，至今顧影自慚，故錄出爲後日之戒。余乙酉三月間從孟河至琴川，余友仲鳴徐君過余寓，談及其店中學生某，住南門外壇上切紙坊內，因腹痛已有三月未愈，煩子過一診。余往診之，脈來滑數，一身肌肉盡削，發熱，少腹左角作痛，日夜哀號。余細將其

少腹按之，少腹左角一處獨痛，細按掌下，惟痛處肌肉最熱。問其原由，云服熱藥熱物更痛，服涼藥涼飲稍舒。余細按其最熱處，已郁郁有膿，漚漚有聲，看其兩足，能伸能屈。余曰：此乃內癰。經服藥三月，未曾有言內癰者。吳萸、薑、附、桂熱藥過多，煨煉成膿。余不能刀針使膿外泄。此膿在腸外膜裏，若膿從大便出，便出，腸必腐壞，若膿從臍出，裏膜必穿。如有名手能開，膿從原處而出，可望生機。若膿從大便臍中出者，俱屬不救。余寫牡丹皮散合活陽散毒丹法主之，卽辭曰：從速延瘍科開之，尙有生機。遲則不救。當日卽延著名瘍科視之，逐日更醫，皆束手，延至十餘日，臍中潰膿，胃氣漸敗而逝。嗚呼，瘍科不能治內癰，聽其自潰而不早治，釀成大患，何異援兵任人居危城之中，羅雀掘鼠，不能濟之以糧，又不能突圍救之，聽其自斃乎？余思之，捫心自愧，未習刀針手法，誤人性命，所以徐靈胎謂葉天士內科不知外科，得醫術之半。余謂內科不能識症，外症不能刀針，一遇內癰，皆如雲中觀月，霧裏看花，挨延日久膿成，聽其自潰而死，醫者能諉爲無過乎？甚矣醫術之難全也。

凡治內癰，婦女較男子更難。余憶在師處，有丹徒某大族新婦，經停三月，皆謂有娠，至四月，少腹作脹而痛，皆云妊娠而挾肝氣，服金鈴、左金等，痛更甚。後邀吾師，因天雨不願往，令余代之，坐車十餘里，又渡江四五里，喘息未定，宅內請診脈矣。上樓，樓牕緊閉，病人坐幔中，色不能望，音不能聞，問亦不答，手在幔中伸出，切脈遲緊，重按亦澀。余曰：此血氣被寒凝滯。問曰：腹中痛乎？旁人代答：少腹左邊甚痛。舌

又不能看。余又問曰：二便如何？少腹痛處可硬？旁人皆不言，病者羞澀不答。余亦無可如何。尙未午餐，枵腹已甚，手軟無力。卽請紙書方。余曰：少腹作痛，氣滯血凝，日久防成內癰。卽用桃仁承氣，去芒硝加當歸尾、延胡、香附等。聞有婦女在旁唧唧言曰：有妊四月，脈中尙看不出，反言內癰。明知此方決不服矣。飯畢回寓，與吾師述及情由曰：望聞問切，四字皆無，孫真人未診先問，扁鵲見色知病，如此隔靴搔癢，余實不能。後延他醫，皆安胎養血，云產前宜涼，方皆不離黃芩、白朮。至經停五月，見寒熱，少腹硬腫，後膿竄入腿縫，延外科治之，有曰橫痃，有曰便毒，雜藥亂投，膿水淋漓，胃氣日敗而斃。所以病家如此，醫家如此，鮮有不誤者也。此誤不在醫家，而在病家。奉勸富貴之家，有病延醫，望聞問切，當盡其技，病家受益多多矣。

腎俞發

余思腎俞發皆屬虛症，實症則百無四五，或其人正氣本實，或膏粱煎燂辛辣，飲食不節，瘀血積於腎經膜外，或有之，然余未見也。憶昔年在梁溪，遇王君者，香邀余診視，脈來虛數，咳嗽多痰，腎俞發平塌已潰兩孔，膿稀粘膩，脂水淋漓，他醫專以甘涼治肺止咳。余曰：水虧本旺，木叩金鳴，腎虛則水泛爲痰，當先治腎。寒涼溫補宜並用，一清相火，一通腎陽，坎離既濟，陽隨陰長，陰隨陽生。以腎氣丸加知、柏、豬

脊髓爲丸，每日三服，每服二三錢。另服甘溫補劑，戒以屏勞絕慾，戒酒辛炙。至百日後，此癰肌肉已平，瘡口亦合，胃氣甚旺。後竟宴客縱慾，豪飲無度，舊瘡復發，紅腫，瘡口潰裂。經瘍科服牛蒡、銀花等寒涼之品，瘡色更紅高突，以致胃憊面紅汗出，痢下腹痛而歿。腎愈發將及一年，服滋補而瘡，因其縱慾陰傷，龍雷外越。余未見龍雷之火而暴雨能制之者，服寒涼則虛陽更熾，戕脾胃生生之氣，豈有不死者乎。

懸癰

外症與內症看法雖異，其理則同，從中有假熱假寒，最難明察。譬如傷寒之戴陽，寒極似熱，面紅目赤，口燥假渴，索飲冷水，仲景有通脈四逆加豬膽汁湯、白通加人尿豬膽汁湯。如溫病之熱深厥深，陷入營分，膚冷肢厥，喜熱飲不喜涼飲，反用紫雪丹、至寶丹、犀角地黃、白虎、竹葉石膏等湯。此皆內科之假寒假熱也。外科亦然，有一種皮色泛紅，陰分不足，虛陽外越，服溫補腫勢漸平，紅色漸退。亦有色白堅硬，平塌不起，外顯虛象，乃是火毒凝結，氣血不能通暢，一服涼散，皮色卽紅，肌肉漸鬆。此外症之假寒假熱也。此等症最易誤治，然細心者斷不至誤治，究竟有元氣脈息見，症虛實可憑。余憶十餘年前，余姨岳母素有便血，本屬早寡多鬱，後起懸癰，生於穀道之前，溺道之後，先起塊作痛。卽至孟河診之，皆

云濕熱服苦參黃柏薏仁萆薢等苦寒滲利數劑後日見其甚再覆診服數劑臥牀不起症勢日劇着余婦代看之云皮色泛紅光亮如梨按之甚熱用田螺水磨番木鱉調冰片搽之稍安乾則更痛再搽後邀瘍科診之曰懸癰潰後爲海底漏死症也合家驚惶正在歲終有事無可如何余曰素有便血本屬脾虛雖有肝氣兼濕熱肝絡繫於二陰補中益氣湯最宜此方之升麻柴胡卽是疏肝之品當歸是養肝之品東垣先生曰治脾不若治肝木氣條達土氣自舒參草甘溫助脾白朮陳皮調胃祛濕余將補中益氣本方加茯苓泄其已阻之濕大劑三服痛減紅退而腫收再服兩劑而飲食漸增腫退盡痛亦止後服歸脾湯五六劑平復如故至今十餘年強健如昔所以補中益氣湯人皆云升清不知東垣先生方中有疏肝扶土之妙鄙言以爲何如若依瘍科用苦寒淡滲利濕清熱此症決致不起

痔漏

內經云因而飽食筋脈橫解房室勞傷腸澼爲痔風熱不散穀氣流溢傳於下部故令肛門腫滿結如梅李核甚者變而爲瘻也五臟切宜保養勿令受邪旣成痔漏當調飲食寡慾節勞皆可帶病延年余三十歲時肛側外如李潰膿後深寸餘插藥條逐日有膿中按有孔如豆大而深余搽以海浮散膏藥蓋之內服調和氣血之藥一月痊愈如故後逢房室勞碌卽作脹流水余卽寡慾節勞今已十五六年

未發矣。

前陰

外科刀針手法，雖有傳授，然心思靈敏，各具稟賦。聞之吾師曰：孟河奚大先生，刀針治法，巧奪天工，不愧名醫。有上海世家某姓女，受濕陰門潰爛，外科敷以生肌藥，後俱長合，僅餘一小孔，惟能洩溺，生育無望矣。又請醫剖開，仍敷以止血生肌藥，長合如故。連剖數次而俱長合，痛苦萬狀，聞者慘然。偕其兄特到孟河就醫於先生，述病情始末。奚某曰：甚易，一月可完璧歸趙。奈其事實難，不能治也。其兄問故。奚某曰：此症非父子母女夫婦不避嫌疑，不可施治。若欲吾治，當拜吾爲義父。兄妹允諾。數日後將此女攜入內室，先服健脾補氣養血利濕等調理藥十餘劑。後用白蠟和生肌藥置火上熬熔，將油紙剪方，拖滿藥汁，作夾紙膏百張。再將女前陰用刀破開，上止血藥，以夾紙膏雙疊折好，命病人正臥，夾入前陰縫中，洩則去之，洩後拭盡再夾，日三四次，約用去夾紙膏七八十張，兩旁俱已完全長好。其巧思非他人所能想到，奚某可謂絕世聰明矣。

截臂

後漢華元化刮骨療毒，傳爲千古絕技。吾孟河馬氏之刀針手法，素有家傳。余見馬日初前輩，治一小童，年十五歲，因割草爲土灰蛇咬傷手背，漫腫乾癰，皮皺肉黑，臭不可近，黑色漸近尺澤。踵門求治。先生曰：肌肉已死，治亦無益，若再延下，黑至肩腋，毒攻入心，必死無疑，不如去之。先用參一兩煎湯與服，待半日許，飲以麻藥，用紅帶兩條，一紮上白肉處，一紮下黑肉處，俱紮緊，中空一寸，乃黑白交界之處，以鋒刃將肉割開，上止血丹，割至露骨寸許，骨亦青黑，卽用銼將骨四圍銼斷，取下其手，以止血生肌藥敷之，包以玉紅膏，調理一月，其肉長復。此等手法，較之古人，亦無愧色。瘍科中有幾人能望其項背哉。

額上生蟲

常熟束鄉某，額上至髮際，下至眉心，三四寸許，癢痛非常，搔之流水，以麻絲刮之，指甲掐之，如蟻虱有聲。就診於余。余曰：物朽則生蟲，蟲生於濕，額上藥力難及，宜以末藥擦之。用蒼朮、黃連、烏梅等分研細末，癢時搔破，卽擦以藥末。十餘日癢止結痂，半月餘痂落，平復如常。此等症服藥無效，非外用末藥不可。是以學內科者，不可不兼明外科也。

菖蒲根洗痔

毘陵曹青岩先生，諱禾，著有醫學讀書誌三卷，上始軒岐伊尹，由漢唐直至國朝，讀書數百家，一一皆有評論。余讀其書，深服先生無書不讀，博學多聞，爲醫道中出類拔萃者也。陽湖趙惠甫先生之老友也。言及幼時痔漏，治之無效，問先生。先生曰：前有一典中司帳者，肛漏有數十孔，穿肛穿臀，更穿及股髀，百藥不效，求治於余，亦不能治。過數月，忽見典夥行走如常。問用何藥，笑而不答。遍訪其中使役之人，知是用水菖蒲根一味，逐日煎水熏洗而愈。趙公試之果驗。因秘方不可湮沒，故錄之以俟後之試者。又一人用竹茹做椅墊，夏天坐之，亦驗。又有一方，余屢試之亦驗，用向東楊樹根四兩，白蠟一兩，五倍子一兩，槐花一兩，生石膏末一兩，胡桃殼四兩，煎湯熏洗，亦效。但成漏管則無用耳。

余聽鴻醫案

葛蒲根洗痔

[G e n e r a l I n f o r m a t i o n]

书名=余听鸿医案

作者=（清）余听鸿著

页数=94

SS号=11188715

出版日期=1963年03月第1版